

ՄԱՏԵՆԱԶԱՐ “ՍՊԱՏԻԱՅԻ”, ԹԻՒ 18

ՕՆ. ՄԻՒԹԱՐԵԱՆ

ՎԱՐԴԱՆ ՄԱՄԻԿՈՆԵԱՆ

(ՊԱՏՄՈՒԱԾ Ք)

1054



PRINTED IN BULGARIA

1936


ՏՊԱԳՐՈՒԹԻՒՆ «ՄԱՍԻՍ»,
ՍՈՅԱՒԱ.

891. 99

Մ-79

03 JUL 2013 89A 61

44385



105 X



1261-2009

ՎԱՐԴԱՆ ՄԱՍԻԿՈՆԵԱՆ

ՎԵՐԱԲԵՐ

I.

Մօտ ու հեռու ծանօթները, բացակայութեանը պարզապէս ախմախ Մնօ կ'անուանէին զինք։ Ուրիշները պարզ Մնօ կամ Շուբացնց Մնօ։ Արհեստակիցները Մնացական, ոմանք ալ, չա'տ քիչ անգամ, հաղիւ Մնացական ախպէր կ'ըսէին, երբ գլուխնին խուզելու կամ երեսնին սափրել տալու գային այն պղտիկ, ֆայտաշէն, գրեթէ բարձրադիր սնառուկի մը նմանող խանութին մէջ՝ ուր ան, առաւօտէն մինչեւ իրիկուն, ամենազգի երեսները առաջ փարայով կը սափրէր և կը խուզէր ամէն մեծութեան զլուխները՝ քսան փարայի վարձատրութեամբ։

Բայց անվերապահօրէն ու ճշմարտապէս Մնացական աղա էր ան տունը, կնոջ և զաւակներու մտերմիկ և ակնածանքով լի մթնոլորտին մէջ։ Ու կնոջը և զաւակներուն բերնէն ջուրեր կը վազէին, երբ կը լսէին Մնացական աղայի ամէնօրեայ պատմութիւնները Պոլսոյ արմանք-զարմանք կեանքի — ծովի վրայ ձգուած կամուրջի, առանց առադաստի վիշապ ձուկի պէս վազող նաւերու և վաճառա-

տուներու մասին, որոնցմէ ամէնէն պղտիկին փորը եթէ վանայ ամբողջ շուկան մտնէր, պիտի ըսէիր թէ ասեղ էր, ձեռքէս ինկաւ կորսուեցաւ...

Ու տակաւին կար մեծադիր լուսանկարը Մնացական աղային, հանուած մէկ արծաթ մէծիսով, Պոլսոյ ամէնէն հոչակաւոր լուսանկարիչին ճարտար մատներով:

Այդ լուսանկարին մէջ, Մնացական աղա, Ռամսէս Երկրորդի նման բազմած էր ցից զրուած աթոռի մը վրայ, ձախ ձեռքը ճիտ հանած դիրքով ծունկին սեղմած, իսկ աջ ձեռքը բռնած «Բիւզանդիոն»ի հերթական համարը: Թէւ տասը տարիներու ճանձեր ծոտած էին լուսանկարին վրայ, բայց Մնացական աղա հոն կը պահէր իր թաւ յօնքերն ու մինչև ականջները ոլորուող ընչացքը, իր ճակատը նեղ, գըլիսը սափրուած՝ երկարաւուն սեխի մը հանգոյն և աչքերը, իրականին մէջ բարի ու միամիտ, բայց չես գիտեր ինչու լուսանկարին մէջ վերածուած կէս ապուշ և կէս կատաղի եղի մը արտայայտութեան:

Տասը տարի Պոլս ապրած, թուրք փաշաներու, հայ ամիրաներու, ֆրանկ միւսիւներու երեսը տեսած և, իր պատմելով, խմբագիրներու և բանաստեղծներու երեսները սափրած ու անոնց հետ նստած ելած մարդ, Մնացական աղա հայրենի քաղաքը վերադառնալով չէր կրնար հանդուրժել այլեւս որ զինքը նուրաշենց Մնօ կանչէին:

— Շուրա՞շ, ի՞նչ Շուրաշ, իմ ազգանունս դարէցդար Մամիկոնեան եղած է ու Մամիկոնեան ու պիտի մնայ: Խըրիմեան Հայրիկ ինծի Մամիկոնեան կը կանչէր, աս շուները ի՞նչ են, որ Շուրաշ կանչեն ինծի, զրեթէ կատղած կը բրթքրթար Մնացական աղա ամէն անգամ, երբ լսէր թէ չարակամն ու բարեկամը նուրաշենց տունը կ'ըսէին, կամ նուրաշենց Մնօ կը կանչէին զինքը:

Եթէ ասոր-անոր, հային-տաճկին չէր կրնար խօսք հասկըցնել, սակայն, մասնաւորաբար իր կինն ու զաւակները դիւրութեամբ կրնար համոզել, թէ ինք Մամիկոնեան օղլու Մամիկոնեան էր:

Ու Մնացական աղա կը պնդէր, թէ իր Մամիկոնեան

գերդաստանը ուղիղ գիծով սերած է հին, դիւցազնական Մամիկոնեան տոհմէն: Ու հազար վայ կու տար գլխուն, անիծելով բախտը և թշնամին, որոնք սատանայի միջնորդութեամբ իրար հետ դաշնակցած՝ Պոլսոյ մէջ հրդեհի տարիին այրած էին նաև այն խանը, ուր սափրիչ էր ինք և ուր, իր գլխի բարձին տակ, կը պահէր կէս ձեռագիր և կէս տըպագրուած այն մատեանը, որ կը բովանդակէր Մնացական աղայի Մամիկոնեան գերդաստանի և տոհմի ամբողջական, մանրամասն և վաւերական պատմութիւնը՝ իր պապերու, պապերու պապերով, հէյ, մինչև քաջն Վարդան Մամիկոնեան, գեռ բան մ'ալ անդին...

Մատեանը հրոյ ճարակ եղած էր, աւա՛ղ, բայց Մնացական աղա իր հինք մատներուն պէս գիտէր անոր բովանդակութիւնը:

Հստ մատեանին՝ Մնացական աղայի պապերու պապերէն շատերը, իշխան և թագաւոր, աւելի շատ և աւելի դիւրութեամբ կտրած էին պարսիկ, արաբ և թուրք զօրավարներու և թագաւորներու վլուխներ, քան ինք յիստւն տարիներու իր արենաստին մէջ երեսներ սափրած էր ու գլուխներ խուզած: Անոնց շինած քաղաքներուն, պալատներուն և վանքերուն հետքերն ու աւերակները՝ շատերը վանի ծովին տակ կորսուած, բայց շատերն ալ մինչև հիմա կը մնան Մշու դաշտէն միչև Սիս-Մասիս: Այդ պապերէն շատերը պատմագիրներ, փիլիսոփաներ, սուրբեր, կաթողիկոսներ և մանաւանդ բանաստեղծներ եղած են: Այ, օրինակ, Մնացական աղայի պապը, ինչպէս լուսահագի Գարեգին եպիսկոպոսը ըսած էր, անուս փիլիսոփայ էր, առակներով կը խօսէր միշտ: Քիչ կը խօսէր, բայց մէյ մը որ խօսէր, հայ, տաճիկ, ֆրանկ, ինկիրիկ, բերանը բացած մտիկ կու տային ու կ'ըսէին:

— Տօ՛, եամա՞ն, էսքան էլ խելք կ'ըլնի՛... էս մարդը որ հայ չլինէր, ֆրանկ լինէր, եզոփոսին կը տանէր աղբիւր, ծարաւ ես կը բերէր...

Իսկ Մնացական աղայի հայրը, լուսահոգի Մամիկոն, Խրիմեան Հայրիկի աջ թեւն էր եղած և իր սեփական մատ-

ներով շարած էր անոր Արծուի Վասպուրականը... Այն եր-
գը, որ հիմա ամէն մէկուն բնրանն է՝

“Հայրի՛կ, հայրի՛կ, ուռ հայրենիք,
Վասպուրական մեր աշխարհ,
Վարդի փոխան ենց փուռ բերաւ
Ցաւերդ ըրաւ մեկ հազար...”

Ո՞վ հնարած է, գիտեն թէ չէ... Անխելք ու աննա-
մուս մարդիկ կան, որոնք կը պնդեն, թէ ուրիշ մարդ,
ուրիշ վարժապետ կամ բանաստեղծ հնարած է:

— Անամօթնե՞ր, կը գորգոսար Մնացական աղա, սո՛ւտ
է, սո՛ւտ է, սո՛ւտ է. այդ երգը հնարած է լուսահոգի հայ-
րըս, Մամիկոն, անուան մեռնիմ...

Երբ Մնացական աղա Պոլիս էր ու Հայրիկը պատրի-
արք, Աստծու ամէն կիրակի, պատարագէն վերջ, ի՞նքը,
Հայրիկը ձիաւոր մը կը զրկէր Մնացական աղայի ետեւէն,
թէ

— Ա՛յ մարդ, եկո՛ւր, ո՞ւր մնացիր, սիրտս կը նեղ-
ուի, փարլամիթ կ'ըլլամ առանց քեզ, եկո՛ւր մէյ մը կարօ-
տըդ առնեմ...

Ու Հայոց Հայրիկին հետ Մնացական աղա սուրճ կը
խմէր, բաւլու, տամա կը խաղար, թանապուր կ'ուտէր, և
թերթ ու մատեան քրքրելով կը յիշէին Մամիկոնեան գեր-
դաստանի փառաւոր անցեալը...

Ա՛յ, այս ածելին ու մկրատը, որ հիմա խնամքով պահ-
ուած են Մնացական աղայի սնտուկին մէջ, ժամանակ մը
ածիլած են Հայրիկի սուրբ երեսը և յարդարած անոր սպի-
տակափառ մօրուքը:

— Տե՛ս, Մնացական աղա, ըսած էր յաճախ Հայրիկ,
չելեմ չիմանամ, որ չկարգուիս, Մամիկոնեան գերդաստանը
անժառանգ ձգես: Պսակուէ՛, տղուդ անունը Վարդան դիր.
ան պիտի իր լուսահոգի պապը, Մամիկոնը քաշէ, բանաս-
տեղծ պիտի ըլլայ: Երբ մեծնայ, դպրոցը աւարտէ, էջմիա-
ծին, Եւրոպա, Ամերիկա զրկէ, թող մեծ մարդ դառնայ.
վերջն ալ տպարան մը առ, թող թերթ ու գիրք զրէ. այդ-
պէսով դուն ալ, Մամիկոնեան գերդաստանն ալ կը փառա-

լորուիք, ազգն ալ կը լուսաւորուի... Դուն բանաստեղծ
չեղար, գոնէ աղադ թող ըլլայ: Լուսահոգի Մամիկոնի կի-
սատ թողածը աւել աւելօք շարունակէ...

Մնացական աղա ամէն անգամ ալ սուրբ երդում կե-
րած էր Հայրիկի ներկայութեան և անոր հայրական յոր-
դորն ու պատգամը կը պահէր ու կը կրկնէր ամէն իրիկուն,
տղուն, Վարդանին, որ ծնած ու մեծցած էր, արդէն դպրոց
կ'երթար և հիմա դասագրքի բոլոր ոտանաւորները անգիր
դիտէր:

Եւ երբ օր մը, Կաղանդի իրիկուն, չամիչով, փշատով
ու կաղինով լեցուն սեղանին առջև, Վարդան, քիթը ամուր
մը մաքրելէ ետք, ոտքի ելաւ և սովորական “Հայր մեր, էն
վերջ արտասանեց իր գրած առաջին ոտանաւորը, նուիրուած
իր լուսահոգի պապ Մամիկոնի յիշատակին, Մնացական աղա
յուղումէն լացաւ և տղուն մեծ գլուխը իր կուրծքին սեղմե-
լով՝ դարձաւ բարակ, գեղին ու կապոյտ մոմերով լուսաւոր-
ուած Հայրիկի նկարին և արցունքի մէջ հեծկլտաց.

— Հայ-րի՛կ, Հայ-րի՛կ, քու տունը չաւրուի, Հայոց
Հայ-րի՛կ, ո՞ւր ես, մէյ մը թեւ առ թոփր, եկուր տե՛ս և
լոփր է՛տ, անաստուա՛ծ...

Հիմա Մնացական աղայի միակ երազն էր, որ Վար-
դան շուտով աւարտէր դպրոցը, որպէսզի զայն զրկէր էջ-
միածին, ձեմարան, Հայրիկի մօտ, Հայրիկի ձեռքին տակ,
թերթեր ու գրքեր հնարելու...

— Խե՛զ Հայրիկ, կը մտածէր ու անկեղծօրէն կը
խղճար յաճախ Մնացական աղա, ոչ Հայոց աղաստութիւնը
տեսար, ոչ ալ թագ դրիր թագաւոր եղար, գոնէ այս մէկ
մուրազդ կատարուեցաւ. Վարդանս բանաստեղծ, փիլիսոփայ
դարձաւ:

Ու Մնացական աղա բորբոքուն երեւակայութեամբ կը
տեսնէր դարձող ու աղմկող մեքենաները տպարանին, այն-
քա՞ն նման Պոլտոյ մէջ իր տեսած տպարաններուն և մեքե-
նաներուն, որոնք աջով Վարդանի ոտանաւորները կը շա-
րէին, ձախով կը տպէին զանոնք, ու աչքդ փակած չբա-
ցած՝ կը վերածէին մե՛ծ, մե՛ծ գիրքերու: Ու այդ գիրքե-

րու անթիւ, անհամար օրինակները կ'երթային կը հասնէին աշխարհի բոլոր ծայրերը, մինչև Ամերիկա, մինչև Չինմաշին ու Հնդկաստան, ուր որ հայ մը կայ և կամ քրիստոնեայ մը... Ու ամէն մէկ ընթերցող բերանը բաց պիտի մնար ու հազար երանի պիտի տար իրեն, Մնացական աղա Մամիկոնեանին, որ Վարդան Մամիկոնեանի պէս բանաստեղծ, փիլիսոփայ զաւակ ունի...

Բայց անցաւոր է մեր կեանքը և, ինչպէս մեր տխուր աշխարհին վրայ շատ շատերու, Մնացական աղայի երազն ալ փորը մնաց: Միեւնոյն տարին, երբ Վարդանի տաղանդը Այգեստանի վարդերուն պէս նոր կը փթթէր, Հայրիկը էջմիածնի մէջ կը մեռնէր, իսկ իր սափրիչի խանութ սընտուկին մէջ օգոստոսի տօթին առատ ու իւղալի փիլաւին հետ Աստուածածնայ նոր օրհնուած թթու խաղող ուտելէն ետք, փորը բոնած տուն դառնալով և երեք օր ու գիշեր՝ «Ախ փորս, վայ փորս» կանչելով, Մնացական աղա կը մեռնէր և, ինչպէս թերթերը պիտի գրէին, եթէ գիտնային, ընդմիշտ կը փակէր իր բոլոր հաշիւները այս աշխարհին հետ...

Մեռներով՝ Մնացական աղա սափրիչի իր չորս ածելիներուն, զոյտ մը մկրատներուն, խուզելու մեքենաներուն և թուրքերու գործածած ծուռ ցոլացնող հայելիի մը հետ ուրիշ ոչինչ կը ձգէր իբրև ժառանգութիւն, եթէ ոչ Մամիկոնեան ազգանունը պատմական մեծագործութիւններով փառաւորուած և Վարդանին ուղղած իր ամէնօրեայ սրբազն երդումն ու աւանդը, որ կը խանար քառեակի մը պէս հնչող այս պատգամին մէջ.

— Տպարան մտիր,
Թերք, երգ հնարե,
Բանասեղծ եղիր,
Յեղս լուսաւորե...

2.

Քաղաքին մէջ ապարան չկար, սակայն: Վարդան, սկիզբը, տակաւին հօրը կենդանութեան, իր կրակ ու բոց

ոտանաւորները կը տպէր դպրոցի աշակերտական «Լուսաստղ» ձեռագիր՝ թերթուկին մէջ, ուսուցիչներու բերանը բաց ձըգելով և ընկերներու նախանձը շարժելով:

— Զարժանալի՛ բան, կ'ըսէր ամէն անգամ Վարդանի թուաբանութեան ուսուցիչը. այս տղան երբեք չկրցաւ գիտնալ, թէ երկու անգամ երկուսը չորս և չորս անգամ չորսը տասնըլից կ'ընէ, բայց իր ոտանաւորներու տողերը տասնըլիցին պակաս ու տուներու տողերը չորսէն աւելի չեղան...

Նոյն ապշութեան դատապարտուած էին, բացի շարադրութեան ուսուցիչն: մաշեալ գրեթէ բոլոր առարկաներու ուսուցիչները: Աշխարհագրութեան ուսուցիչի բոլոր հարցումներուն Վարդան կը սիրէր սկսիլ կամ վերջացնել Պոլսոյ, էջմիածնի, Մասիսի և Վարագի մասին, սրովհետեւ այդ բոլորը, այնքան մանրամասնօրէն ու ծաղկազարդեալ, սորված էր հօրմէն, իսկ հայոց պատմութեան ուսուցիչի դասերուն Վարդան ճարտասան կը կտրէր, երբ խօսքը Մամիկոնեաններու իշխանութեան կը վերաբերէր: Կարծես դասը ոչ թէ հեռաւոր անցեալի, այլ երէկ իրիկուն Մնացական աղայի պատմած և Պոլսոյ մէջ հրոց ճարակ դարձած կէս ձեռագիր, կէս տպագիր մատեանի մասին էր:

Անգամ յը նոյն պատմութեան ուսուցիչը հարց կու տար դասարանի բոլոր աշակերտներուն, թէ ո՞վ ինչ գիտէր հայոց մայրաքաղաք Անիի մասին: Վարդան ինքզինքը կերաւ և զլուխը այնքան օրօրեց ու առաջ ձգեց, մինչև որ ուսուցիչը վերջապէս սիրալիր եղաւ ու ըստը.

— Լա՛ւ, թող Վարդանը պատմէ:

Վարդան կարճլիկ ոտքերուն վրայ ելաւ կանգնեցաւ, արտակարդ մեծութեամբ փորին վրայ դարսեց ձեռքերը և նիհարիկ վիզին վրայ մեծղի գլուխը ճօճելով, սուր ու հնչեղ ձայնով ճչաց.

— Անի հաղաք նստեր կու լայ,

Զկայ բսող մի՛ լայ, մի՛ լայ...

Աշակերտները հիացում կտրած, իսկ ուսուցիչը, որքան բարկացած, նոյնքան ապշած էր:

Շատ չանցած դպրոցի անօրէնը կանչել տուաւ Վարդանի քեռին և առաջարկեց արհեստի մը դնել կամ առեւտրականի մը մօտ աշկերտ մտցնել վարդանը:

— Երկու տարի է դասարանը չի փոխեր, ըսաւ տնօրէնը, և սուտ ու սխալ ոտանաւորներ գրելէ զատ ուրիշ բան չի սորվիր: Ստիպուած ենք արձակել դպրոցէն:

Քեռի Սիմոն, որ գործնական մարդ էր, ամբողջ ամառը չկրցաւ համոզել քոյրը, Վարդանի մայրը, որպէսզի տղան արհեստի մը տայ:

Մայրը իր բախտը կ'անիծէր, իր ազիզ մարդու, Մնացական աղայի կտակը ի՞նչպէս ջուրը ձգէր:

— Կ'երթամ ուրիշներու տունը լուացք-թափ կ'ընեմ, կ'ըսէր ու կու լար մայրը, շան-աաճկի կեղտերը կը լուամ՝ չեմ թողներ ու չեմ թողներ, որ մէկ հատիկ տղաս դպրոցէն հանեն:

Ուրիշ անգամ, նոյն Քեռի Սիմոնի յորդորները լսել իսկ չուզող մայրը՝ կ'ըսէր.

— Վարդանիս խելքին գրչին մեռնիմ: Էս վարժապետները Վարդանիս շունը չարժեն: Վարդան, մատա՛ղ, էս գիշեր գրածդ ոտանաւորը մէյ մը բե՛ր՝ թո՛ղ քեռիդ կարդայ, որ հասկնայ...

— Զանգը, քոյրս, ես չըսի թէ գէշ կը գրէ, խորամանկօրէն կը շողոքորթէր Քեռի Սիմոն, զգալով որ միայն այդ ճանապարհով կրնար համոզել քոյրը, զոր թեթեւամիտ կը համարէր:

— Աֆերի՛մ, Վարդան, կը շարունակէր Քեռի Սիմոն: Իմ ըսածմ ի՞նչ է արդէն: Վարդան իր այս խելքով, գրիչով ալ ի՞նչ պէտք ունի վարժարանի: Ծօ՛, անոր վարժապետները ես հոտաղ ալ չեմ բռներ: ուղղական, սեռական, իւշեալ ամսական... Հա՛, քոյրս, ջանս, իմ ըսածս ալ ճիշտ այդ է արդէն:

Ու տեսնելով քոյրը քիչ մը կակլած, Քեռի Սիմոն, վստահ, որ զայն համոզելու թոյլ երակը բռնած է արդէն՝ կը շարունակէր.

— Երէկ Գափամաճոնց Մեծ Աղան խանութիս առջեւէն

կ'անցնէր. մօտեցաւ, թէ՝ «քրոջդ տղան ինչո՞ւ չես զրկեր վաճառատունս, թող գայ մարդ ըլլայ, տոմարներս, հաշիւներս բռնէ, զիր-նամակ զրէ, վերջը հարկաւ ամսական ալ կը կապեմ»...

Վարդանի մայրը կարծես կը համոզուէր: Ու Քեռի Սիմոն կը շարունակէր.

— Հա՛, ես ալ ճիշտ քու ըսածը կ'ըսէմ, քոյրս: Վարդան մէյ մը որ Գափամաճոնց գործին մտնէ, տարիէ մը ամսական կ'առնէ, երկու տարիէն ոսկիներու հետ կը խաղայ, վերջն ալ տեսար Մեծ Աղային աչքը մտաւ, մասընկեր դարձաւ...

— Աղէկ, քե՛զ մեռնիմ, հապա ողորմածիկ մարդուս կտա՞կը, հապա Վարդանս էլ ոտանաւոր չգրէ^o, սրամտած կը հարցնէր մայրը:

— Ալլահ, հալլա, կը ծիծաղէր Քեռի Սիմոն: Ոտանաւորն իր տեղը գործն ու ոսկին իր տեղը: Ոտանաւոր չգրէ^o: ինչո՞ւ չգրէ, ձեռքը բռնողը ո՞վ: Թող մէյ մը գործի մտնէ, վրան զլուխը շտկէ, պատիկ ապագայ մը շինէ, յետոյ, ջունըմ, ոտանաւորը հօ թոչուն չէ, որ թե առնէ թոչի, ալ չգայ: Թուղթ գրի՞չը կը պակսի, ո՞րքան կ'ուզէ թող գրէ...

Վարդանս ու մայրը վերջնականապէս նուաճուած կը թուէին հիմա, ու Քեռի Սիմոն կը շտապէր Գափամաճոնց Մեծ Աղային մօտ, ձեռք ոտք իյնալու, հազար ու հազարաղաչանք պաղատանք ընելու, որպէսզի անոր զութը չարժէր և որբ Վարդանը իր քով աշկերտ առնէր:

Ու Քեռի Սիմոն անվերջ կ'անիծէր հայրը այն մարդուն, որ աշխարհի վրայ առաջին անգամ ըլլալով՝ ոտանաւոր գրած էր և սատանայի օրինակ դարձեր խեղճ ու անխելք այնքան ուրիշներու, որոնցմէ մէկն ալ իր հարազատ քրոջ թշուառ զւեակը, Վարդանն էր:

3.

Աիզը ծուռ, ճակատագրական հարուած մը ընդունողի պէս խելօքիկ և հլու, Վարդան ամէն օր ժամ մը հետիւտն

ճամբայ կարեց, հասնելու համար շուկան, մեծ վաճառատուն, իր նոր պաշտօնաասեղին, զոր ասպարեզ կենաց կը կոչէր Քեռի Սիմոն։

Առջի օր Մեծ Աղան չափեց չափչիքեց Վարդանի հասակը, քալուածքը, շարժուձեւը, թիթե քննութեան մը ենթարկեց անոր խելքին հետ ձեռքի և մէջքի ուժը և, գլուխը օրօրեւով, երկար աւել մը ձեռքը տուաւ, պատուիրելով երթալ սրբել-մաքրել այն խանը, ուր վաղը նոր ապրանքներ պիտի տեղաւորուէին։

Յաջորդ օրերուն Վարդանի պաշտօնը ընդմիշտ որոշուած կը թուէր վաճառատան մէջ։ Արեւը ծագած՝ չծագած՝ տակաւին փակ վաճառատան առջև պիտի տնկուէր, մինչև որ Մեծ Աղան ու միւս աշկերտ-գործակատարները գային։ Աւելը ձեռքը՝ պիտի աւէլէր-սրբէր ամբողջ վաճառատունը իր յարակից մասերով։ Պիտի վազէր թէյ, ուուրճ, կլկլակ կամ ճաշ պատուիրելու Մեծ Աղային, անոր հիւրերուն, ոսկի ցնծացող յաճախորդներուն և վաճառատան միւս բոլոր պաշտօնեաներուն համար։ Պիտի վազէր աղբիւրէն ջուր բերելու, յաճախալ մէջքին կամ ուսերուն չիթի, կտաւի, կերպասի մեծ ու ծանր կապոցներ դրած փոխադրէր պիտի այս ու այն խանութը։

Իրիկունները, երբ շուկան կը դատարկուէր ու կը փակուէր այլեւս, Վարդան նոյն ժամ մը ճամբան հետիոտն պիտի կարէր, միայն այս անգամ մեխով, ձմերուկով բեռնաւորուած, կամ հաւ ու աքաղաղ և իւղ ու մածուն փոխադրելով Մեծ Աղայի տունը, Ամսականը յետոյ պիտի կապէին, տարիէ մը, երկու տարիէն։ Վերջապէս՝ յետոյ։

Ծանր էր այս բոլորը, բայց ոչինչ, քանի որ երեխն վարդան կրնար, յայտնի կամ գաղտնի, քաշուիլ ներսը, ընդարձակ վաճառատան մէկ մութ, գրեթէ անտեսանելի անկիւնը, մեծ հակերուն ետեւը, և մատիուը ձեռքն առած ոտանաւորներ գրել, երբեմն բոլորվին կարուելով նիւթական առօրեայ աշխարհէն և մոռնալով ժամ ու ժամանակ։

Վարդանի սրբազան ներշնչման այդ պահերէն միոյն, ի զուր Մեծ Աղան «Վարդան, Վարդան» կը կանչէր, պատ-

ուիրելով երթալ հաց-ժաժիկ և հատ մը վարունգ բերել։

Վարդան չէր լսեւ բնաւ, որովհետեւ այն ատեն երպ Աղայի անօթի փորը հաց-ժաժիկի և վարունգի համար կը տառապէր, Վարդանի հոգին զուրս կու գար և «փուշառվ վերջացող իր ոտանաւորի մէկ տողին համար համապատասխան բառը չէր կրնար գտնել։

Մուկ բոնող կատուի քայլերով Մեծ Աղան քը սս մօտեցաւ այն անկիւնը, ուր Վարդանն էր և փոշու ակնոցը ահագին քթին, պոչատ մատիտ մը իւղաս ու մինչև ականջները իջած ֆիսին տակը ամրացուցած, մէջքը ծուռ և զոյգ կակուղ ու մազսա ձեռքերը ետեւը ծալլած, հոգէառ զեւի մը մը պէս ֆըսֆոս վերջապէս Վարդանի գլխավերեւը, որպէսզի ան վերջ դնէ իր ոգեւորութեան և զգայ իր ներկայութիւնը։ Վարդան դիւահար եղաւ կարծես, մինչդեռ Մեծ Աղան ձեռքը պարզած էր։

— Տուր տեսնեմ ինչ կը գրես։

Վարդան գոյն կու տար կ'առնէր, իսկ Մեծ Աղան մեծ լրջութեամբ ու համբերութեամբ կը կարդար ոտանաւորը ծայրէ ծայր, մինչև վերջին, տակաւին անաւարտ տողը։

— Աս դո՞ւն գրած ես, հարցուց Մեծ Աղան, կարծես մեղմ ու բարի և քիչ մը զարմացած։

Վարդանի սիրազ արագ արագ կը բարախէր։

«Ա'խ, եթէ Մեծ Աղան իմանար, որ ինք ոտանաւորներ կը գրէ, թերեւս պաշտօնը բարձրացնէր և հիմակուընէ իսկ ամսական կապէր և օրուան մէջ քանի մը ժամ ազատ պիտի ձգէր զինքը միայն և միայն ոտանաւորներ գրելու», արագ մտածեց Վարդան և պատասխանեց։

— Հրամա՛նք ես...

— Հոել է օալի՛ր ես եղեր, գլուխը ծանր ու հանդարտ օրորելով ըսաւ Մեծ Աղան, Աղէ՛կ, շա՛տ աղէկ։ Է՛, ըսէ տեսնեմ գրածդ կրնա՞ս երգել։

Վարդան չնասկցաւ, բայց չես գիտեր ինչու ակամայ բերնէն թոցուց։

— Հրամա՛նք ես...

— Խը՛, խը՛, խը՛, աւերակ բերանը բացաւ Մեծ Աղան և հրհուց։

Յեսոյ մէկէն լրջացաւ, աչքերը ակնոցին տակէն շեշտ
յառեց Վարդանին ու նոյն կարծես մեղմ, բարի ու քիչ մը
զարդացած ձայնով ըստւ.

— Բայց սազ ալ ունի՞ս. առանց սազի ասիկա չեմ
կարծեր որ աղուոր ըլլայ...

— Ո՛չ, չունիմ, պատասխանեց Վարդան, որ տակա-
ւին ոչինչ հասկցած էր ու կը պատասխանէր մեքենաբար,
իր կամքէն անկախ:

— Զունի՞ս: Ավատս: Իշտի առ մէկը աղէկ չէ, ըստ
Մեծ Աղան մեծ ցաւակցութեամբ ու անմիջապէս ձայն տը-
ւաւ.

— Օհա՛ննէս, Յա՛կոբ, Սա՛րգիս, Սա՛հակ, Մա՛րգար,
Նիկո՛ղոս...

Ընդհուպ հաւաքուեցան վաճառատան բոլոր պաշտօն-
եաները, որոնցմէ ոմանք կանգնելու տեղ չգտնելով, ոսքե-
րու ծայրերուն վրայ ելած ու վիզերնին երկարած հրամանի
կը սպասէին, տեսարանը դիտելով:

— Տղա՛ք, ձեզմէ ո՞վ սազ ունի, հարցուց Մեծ Աղան՝
շարունակելով իր լրջութիւնը պահել:

Պաշտօնեաները իրար անցան: Սա՞զ: Ի՞նչ սազ: Ոչ ոք
սազ ունէր:

— Դո՞ւք ալ չունիք, շարունակեց Մեծ Աղան: Զե-
ղա՛ւ, չեղա՛ւ աս: Ասանկ մեծ շայիր մը ունենանք մեր վա-
ճառատառնը ու սազ մը չըլլայ: ասիկա վաճառատանս հա-
մար մեծ ամօթ մըն է: Ուրիշները լսեն ի՞նչ պիտի ըսեն:
Վազէ՛, վազէ՛, Օհա՛ննէս, գեղեցիկ սազ մը գնէ, տե՛ս որ
լարերը արծաթթ ըլլան, կոթն ալ ոսկի: Անանկ չէ՞, տղա՛ս,
Վարդան: Բայց կեցի՛ր, Օհա՛ննէս, կեցի՛ր, թող Վարդան
անզամ մը իր գրած ստանաւորը կարդայ: Կարդա՛, տղա՛ս,
կարդա՛, իմ աչքերս լաւ չեն տեսներ, զուն կարդա, իսկ
մենք կը լսենք... Կ'ուզես նէ երգէ՛: Սպասէ, Կ'ուզես նէ
շուկայէն մարդիկ ներս կանչենք, թող անոնք ալ լսեն,
ի՞նչ կ'ըլլայ, քանի որ սասանկ աղուոր ստանաւորներ կը գը-
րես, ինչու ամէն մարդ չլսէ: Դէ՛, երգէ՛, Վարդան, եր-
գէ՛, տղաս, երգէ՛, մի ամշնար...

Վարդան նոր միայն զգաց Մեծ Աղայի թունաւոր ծաղ-
րը, զոր սակայն բացատրել չէր կրնար: Զայն ծպտուն չէր
հաներ, այլ միայն երկչոտ հայեացքը նետած էր Օհաննէսի
փայլուն կօշիկներուն ու անիմաստօրէն կը խաղար մատնե-
րուն հետ:

Յանկարծ Մեծ Աղան ֆեսը ճակտէն քչեց ծոծրակին,
ահազին փորը անկեց, քիթը ուժով մը վեր քաշեց, մեծդի
սազի մը դանդաղ օրօրումներով աւելի առաջ եկաւ ու Վար-
դանի ականջները ամուր բռնեց մը և ոլորեց:

— Իշո՞ւ ձագ, ըստւ, աս հունարները ո՞վ սորվեցուց
քեզի: Հոս հօրդ սափրիչի իւանո՞ւթը կարծեցիր: Աս ո՞ւր
ես, գիտե՞ս: Վաճառատանս անունը ի՞նչ է, գիտե՞ս: Դուն
հոս մա՞րդ ըլլալու եկար, չէ նէ շայիր, հոս աշխատելո՞ւ տեղ
է, թէ տանաւորներ գրելու...

Վարդանին կը թուէր, թէ ականջները այլեւս իրը
չեն, սակայն, մէկ անդամ հազիւ ճշաց աքաղաղի մը պէս,
որ մորթելու կը տանին:

Մեծ աղան հիմա Վարդանի ականջները թողած, իւ-
ղոս ձեռքերը նորէն կռնակին վրայ ծալլած և փորն ու քի-
թը տնկած՝ սկսաւ ետ ու առաջ երթալ գալ:

Անցաւ մէկ ամբողջ վայրկեան, որ գար մը թուեցաւ
Վարդանին: Ան հիմա կը սպասէր ճակատագրական հարուա-
ծին, թէե անոր համար միեւնոյն էր, թէ ո՞վ էր հար-
ուած տուողը: Հարուածը չուշացաւ և Մեծ Աղան վերջին
անզամ ըլլալով պայթեցաւ.

— Հո՞ս ես, Օհա՛ննէս, չո՞ւտ աս շայիր զենէ-
բերին կօշիկները ձեռքեր տուէք, թո՞ղ երթայ: Ինձի շրադ
պէտք էր և ոչ թէ Սրիստոսէլ...

Վարդան հիմա ազատ էր:

Իր քրոջ աղան գործի, արհեստի գնելու Քեռի Սիմոնի
բոլոր ձիքերը, հնարքները և ճարտասանութիւնները զուր
անցած էին: Մայրը՝ շա՛տ շամաձայն էր, որ վարժա-

պետ ըլլար տղան, իսկ ինքը, վարդան, միայն ու միայն պապին, լուսահողի Մամիկոնի ճամբան կ'ուզէր բռնել՝ բանաստեղծ, փիլիսոփայ ըլլալ, տպարանի մէջ աշխատիլ գիրք տպել, ոտանաւոր գրել: Ի՞նչ փոյթ թէ քաղաքին մէջ տպարան չկար: Ինք ոտանաւորներ կը գրէր, կը պատրաստէր՝ մինչև որ տպարանը գար:

Արդէն խօսք կար, որ շուտով տպարան պիտի բերուէր Պոլաէն, նոյնիսկ թերթ պիտի հրատարակուէր շուտով: Եւ մայր ու տղայ անձկութեամբ կը սպասէին տպարանին: Կը սպասէին՝ մայրը լուացք-թափ ընելով, ցախ և տերեւ հաւաքելով և յոյսը մէկ հատիկ այծին, մէկ հատիկ զաւկին ու մէկ մէկ ալ Քեռի Սիմոնէն արուելիք օգնութեան վրայ դրած, իսկ տղան՝ իր գրչին ու ոտանաւորներուն:

Շուտով Վարդանի ոգեւարութիւնը կատղեցաւ ու ան սկսաւ իր ոտանաւորները երգերու վերածել: Հեղինակը, երգահանը, երգիչը՝ ինքն էր: Երբեմն մայրն ու քոյրն ալ կը ձայնակցէին, բայց այդ քիչ էր: Ծշմարիտ բանաստեղծի մը պէս Վարդան գոհ չէր, աւելիին կը ձգտէր, փառքի և անմասութեան կը տենչար, սեփական ստեղծագործութեամբ վարսկել կ'ուզէր իր շրջապատր:

Թաղի տղեկներն ու աղջիկները կանչեց քովը և ստիպելով, համոզելով ու պատուղներով կաշառելով՝ սորվեցուց և երգել առուաւ անոնց իր ոտանաւոր-երգերը: Եւ երբ, ատեն ատեն, փողոցէն կամ զրացիի բակէն ուրիշ բերաններէ լրաց իր ոտանաւորներու բառն ու եղանակը՝ փառքի մէջ լրաց: Իրն էին այլեւս կապոյտ երկինքը արեւով ու աստղերով, դաշտերը կանանչ, լեռները բարձր ու վէս և ամբողջ աշխարհը անձայր ու հսկայ: Ու, դարձեալ, ճշմարիտ բանաստեղծի նման, արհամարենց դրամը, կարեքի և ապրուսի անողոք պահանջը և բարձրէն նայեցաւ գործնական կեանքի ու մարդոց վրայ:

Կը գրէր, անվերջ կը գրէր: Կը գրէր մոմի գողգոջուն և ձէթէ ճխացող լոյսերուն տակ: Երբ լոյսը հատնէր՝ կը գրէր մութին մէջ, այնքան որ մատիտը վարժ կը դառնար ճեռքերուն մէջ ու արագօրէն կը սեւցնէր սպիտակ թուղթը:

Կը քնանա՞ր արգեօք, դժուար է ըսել: Խշտեակին վը-րայ պառկած-երկարած, կողէ կող կը դառնար՝ կա՛յ յիշելով ու արտասանելով արդէն ստեղծած ոտանաւորները և կամ նորերու համար նիւթեր, բառեր ու յանգեր որոճալով: Երագներու մէջ ալ կամ գրելով զբաղուած էր և կամ գրած-ները ուրիշներուն արտասանել ու երգել տալով:

Ա՛խ, այդ երազները հրաշալի, երբ իր ոտանաւորներէն մէկը կը տպուէր «Բիւզանդիոն»ի առաջին էջին վրայ, խոշոր տառերով ասորագրուած՝

ՎԱՐԴԱՆ ՄԱՄԻԿՈՆԵԱՆ

Թերթին հետ կը ստանար նամակ մը ուղղակի խըմ-բագրապետէն, որ կը չնորհաւորէր զինքը և թախանձագին կը խնդրէր, ի սէ՛ր Աստուծոյ, շարունակել գրել...

Գրե՛լ գրե՛լ... Հօրաքոյրը, կաղ Արմաղան, ամիսը անգամ մը կու գար, կը պաղատէր.

— Ուկի գրչիդ մեռնիմ, Վարդա՞ն, մէյ մը նամակ մը գրէ մարդուս, մատա՞ղ ըլլամ փիլիսոփայ խելքիդ: Աս ալ գեղ նուէր...

Ու Արմաղան հօրքուր գոփնոցի տակէն կը հանէր վարունգ մը, կամ ճանկ մը ծիրանի չիր, երբեմն ալ արծաթէ մանրիկ քսան փարանոց մը, Վարդան վրդովմունքով դրա-մը կը մերժէր, իսկ պատուղները ներռալամիտ ժպիտով մը ըն-դունելով՝ կը բաժնէր մօրը և քրոջը: Ու գրիչը ձեռքը կ'առնէր: Պահ մը կաթը բերնին կը դնէր՝ մտածելու և կիդ-րոնանալու իբրև նշան, յետոյ զլուխը կը քերէր՝ գրչածայ-րը քանի մը անգամ կը թաթիւէր կաղամարին մէջ ու, թրդ-թի վրայ բռնած, չորս հինգ անգամ օդի մէջ կը տանէր կը բերէր ու վերջապէս կը սկսէր:

Նամակը պիտի երթար Ամերիկա, փեսայ Սարգիսին ձեռքը հասնէր: Սարգիս գրել կարդալ չէր գիտեր, բայց այդ վաղ էր, երբ էշը կաղ էր: Քաղաքակիրթ Ամերիկայի մէջ, ուր անթիւ-անհամոր գիշերային դպրոցներ կան, փեսայ Սարգիս ով գիտէ հիմա ո՛քան զարգացած էր: Թե-րեւս ոտանաւոր գրել ալ սորված էր: Պէտք էր ուրիշն նա-

ՄԱՏՏՈՑԻ

ԱՆՎԱՐ

ՄԱՏԵՆԱԴԱՐԱՆ

Ժակը գեղեցիկ, շա՛տ գեղեցիկ գրել։ Եւ Վարդան նամակը
ուղղակի ոտանաւորով կը սկսէր։

“Ա՛խ, ի՞նչ բնեմ, ի՞նչ սեւ կապեմ, Սարգիս ջան,

Սեւեր առաւ, սեւեր հագաւ եռւ խեղճ-կրակ Արմաղան...”

Ի զո՞ւր Արմաղան հօրքուր կը խնդրէր, որպէսզի Վարդան նամակին մէջ գրէր Սարգիսին իր բանջարանոցի մտասին, թէ ինչպէս շուն ջրբաշխը քիչ ջուր տուաւ այս տարի, թէ կովը որքան կաթ կու տայ հիմա և երբ պիտի ծնի, կամ տանիքը կը կաթի՝ ուստի պէտք է ծեփել տալ, թէ միտք ունի ախոռի պատը քանդել ու քիչ մը մեծցնել, ուստի թող Սարգիս քանի մը ոսկի զրկէ, և վերջապէս, Արմաղան հօրքուր կ'աղաջէր, կը պաղատէր, որ Վարդան անպատճառ, անպատճառ գրէր Սարգիսին թէ դրացի էշ Ներկողենց Մարկոսի հետ իրենց ձնորի վրայ լուսամուտ բանալու դատը դեռ վերջացած չէ։

Վարդան ներողամտօրէն կը ժպտէր և հօրքոջ բոլոր խնդրանքները Այերիկա զրկուելիք նամակի մը համար ուղղակի անվայել համարելով՝ կը հաւաքէր բոլոր լաւագոյն գրական բառերը, զորս իրեն գեղեցիկ կը թուէրին և փեսայ Սարգիսին կը պատմէր թէ ովքեր էին Եազոն, Վասակը և Յուղան, թէ ճշմարտութեան գաղափարը երբ և ինչու պիտի յաղթանակէ, թէ Մամիկոնեանները ինչու համար կը պաշտուին և թէ ինչպէս ամէն գիտակից մարդ պարտաւոր է խմել դառնութեան բաժակը ցմրուր, քանզի՝ “Զախորդ օրերը ձմբան նման կու զան ու կ'Երբան...”

Հոս Վարդան նամուկը վերջացած կը համարէր։ Խորունկ և անկեղծ յուղումով մտօվի կարդալէ վերջ, երկրորդ անգամ ալ բարձրաձայն կը կարդար Արմաղան հօրքոջ և մօրը ներկայութեան, որոնք հիացումէն և մասնաւորաբար իրենց չհասկած բառերէն գլուխնին ծա՛նը, ծա՛նը կ'օրօրէին։

Արմաղան հօրքուր նոյնիսկ կու լար։ Վարդանի աչքերուն մէջ ալ արցունք կը խաղար, բայց մեծ ճիգերով ինքնքը կը զապէր և յուղումէն ուաքի կը թուչէր և հօրքոջ օրհնէնքներու տարափին տակ՝ ձեռքերը լայն ու կախ ին-

կած տափատի ծեղքուած գրպանները զրած, վորն ու հակափորը դուրս ցցած՝ կ'երթեւեկէր սենեակին մէջ։ Ապա, լուսաւոր մտքէ մը հրապուրուած ու զարնուած՝ նամակը ձեռք կ'առնէր, որոշ հատուածներ մտովի կրկին կը կարգար, կրկին յուղուելով՝ ու կը նստէր արտագրելու զանոնք իր ընթացիկ յուշատետրին մէջ։

Եթէ բանասական կը մնար, վարպետ ու արցունքներ խլող նամակագիրի իր հոչակը սակայն ամբողջ թաղին մէջ քերնէ բերան կը շրջէր։ Նոյնիսկ հեռաւոր թաղերէ հարսներ ու մամիկներ կու գային Վարդանի փիլիսոփայ խելքին ու շընորհքին մատալ ըլլալու, որպէսզի ան թուղթ-փուսուլա մը գրէր Պոլիս, Պաքու, Ամերիկա։

— Աստուած է՛լ իմաստութիւն տայ...»

— Սիմոն Ծերունի դառնաս...»

Կը լսէր մայրը՝ օրհնէնքները հարսներուն և մամիկներուն։ Կը լսէր, ուրախութեան արցունքները օճախին առջե մրտած քիթին վրայէն արմուկով կը սրբէր, միշտ ցած ինկող զպունը վեր կը քաշէր և ծալ ծալ իւղ կը կապէր...»

5.

— Քեզ բան մը ըսե՞մ, Վարդան, աս ոտանաւորները լա՛ւ, շա՛տ լաւ, ատոնք հարկաւ օգտակար են թէ քեզ համար, թէ ազգին համար, սակայն զուն եկուր սա գաղղիերէնը սորվէ, շատ աղուսոր, շատ ալ պիտանի լեզու է։ զըպրոցին մէջ չսորվեցար, գէթ հիմա սորվէ։ Ես ձրի կը սորվեցնեմ քեզի, հէ...»

Այսպէս ըսած էր իր դպրոցական ընկերներէն մին, որուն համար ուսողական գիտութիւններն ու լեզուները այնքան զիւրին էին, որքան ոտանաւորներ գրելը Վարդանի համար։

Վարդան իր գործնական ընկերոջ նոյնքան գործնական խորհուրդը, իր սովորութեան համաձայն, ձեռքի թափահարումով մը մերժեց։

Բայց ընկերը վարդանի օձիքը չձգեց։
— Սորվէ՛, քեզի կ'ըսեմ սորվէ, չես զղջար։
— Սորվի՞մ, կ'ըսես, պատասխանեց վարդան, բայց
ինչո՞ւ սորվիմ, ի՞նչ պէտք կայ. մեղք չէ՞ ժամանակիս։
Դուն սորված ես՝ ուրիշ։ Գուցէ հացդ ատով կ'ուզես վաս-
տըկիլ։ Ես բանաստեղծ եմ. գաղղիերէնը իմ ինչո՞ւս պէտք։
— Մի ըսե՛ր, կը սորվիս կ'երթաս վարդապետեանենց
մօտ գրագիր կ'ըլլաս, գէ՞շ կ'ըլլայ։
Վարդան վաղո՞ւց թքած էր բոլոր վաճառատուներուն
վրայ։
— Լա՛ւ, ինչո՞ւ կը բարկանաս, վաճառատունը չես
ուզեր, կ'երթաս հիւպատոսարանի թարգման կ'ըլլաս, ա՞տ
ալ պղտիկ բան է...։
Վարդանի ոտանաւորին մէկ տողը չարժէին աշխարհի
բոլոր հիւպատոսարանները իրենց հիւպատոններով միասին։
— Չեմ հասկնար, չեմ հասկնար, արդէն յոյսը կտրած
գլուխը կ'օրօրէր ընկերը։ Ու վերջին ճիգ մը կը փորձէր։
— Շա՛տ աղէկ, երբեք չըլլայ, գէթ ոտանաւորներդ
գաղղիերէնի կը թարգմանես, կամ թէ կը սկսիս ուղղակի
գաղղիերէնով գրել... Հսէ՛, ասո՞ր ինչ կ'ըսես. ա՞ս ալ գէշ
կ'ըլլայ... ասոր վրայ ալ կը թքնես, հէ...։
Ո՞չ Վարդան ատոր վրայ չէր կրնար թքնել։ Վար-
դան բնաւ անդրադամած չէր։ Ուրեմն կարելի էր ֆրան-
սերէն սորվիլ և ֆրանսերէնի թարգմանել իր ոտանաւոր-
ները, նոյնիսկ կարելի էր ուղղակի ֆրանսերէնով հեղինա-
կել... Հիանալի՛։ Սիրտը խայտաց։ Կարծես հարիւրաւոր
սոխակներ մէկ անգամէն հաւաքուած, բոյն դրած էին ի-
րենց պարտէզին մէջ, և ֆրանսերէն ոտանաւորներ կը ճըռ-
ուողէին։
Բայց, որպէսզի իր հպարտութիւնը չկոտրի ընկերոջ
ներկայութեան և ցոյց չտայ թէ շուտ համակերպողներէն
է, ըստու։
— Լա՛ւ, լա՛ւ, տեսնեմ, քիչ մը մտածեմ, եթէ գոր-
ծիս եկաւ և շատ ժամանակ չխլեց, գուցէ սորվիմ։
Յաջորդ օրը ինքը գնաց գտաւ ընկերը և ուռիի ծա-
ռին տակ պղղած՝ առաջին դասը առաւ։

Այս ո՞րքան հեշտ լեզու էր եղած ֆրանսերէնը։ Լեզու
չէ, եղբա՛յր, բողկ է, հաճելի և դիւրամարս։ Առաջին իսկ
դասին սորված էր գրել իր անուն ազգանունը՝ ֆրանսերէն
տառերով, սորված էր ինչ կ'ըսեն ֆրանսացիները բանաս-
տեղծին և ոտանաւորին։

Հիմա խնդրեմ ըսէ, ֆրանսերէնով ինչպէս կ'ըսեն՝ ես
բանասեղծ եմ, անձկութեամբ հարցուց Վարդան։

— Ատիկա թէև յետոյ պիտի սորվինք, բայց քանի
որ դուն բանաստեղծ ես, կը հսկնամ անշուշտ, թէ էն ա-
ռաջը ատ կ'ուզես սորվիլ։ Ֆրանսերէնով ըսածդ սապէս
կ'ըսեն՝ մը սիւի փօքր։

— Ճը սուի փօք՛ր, մէկ քանի անգամ կրկնեց Վար-
դան, միշտ ալ հակառակ ընկեր-ուսուցիչի ուղղումներուն՝
իւն ու արտասանելով։

— Ճը սուի փօքր։ Իսկ չնորհակալ եմ-ը արդէն գիտեմ՝
մեռմի՛, անհուն ժպիտով մը հնչեց Վարդան ու առաջին դա-
սը, երկուստեղ սիրալիր համաձայնութեամբ, փակուած յայ-
տարարեցին։

Յաջորդ դասերը նուազ բեղմնաւոր չեղան։ Վարդան
սորվեցաւ տանեակ մը բայեր և ածականներ, կրցաւ նա-
խագասութիւններ կազմել և նոյնիսկ իր նոր գրած ոտա-
նաւորներէն մէկի առաջին և վերջին տողերը, ուսուցիչ ըն-
կերոջ օգնութեամբը ֆրանսերէնի թարգմանեց։

Վարդան հիմա տանը դրան, տեսրակներու, գը-
րասեղանի, տեսրակներու, գրադարանէն բերած գրքերու,
գրչին տակ ինկած թուղթերու, սեղաններու, պատերու,
աւազներու, քրոջ մէջքին վրայ՝ մատիտով, գրչով, կաւի-
ճով, գաւազանի ծայրով ֆրանսերէն կը գրէր։ Պահ մը նոյն
իսկ այնքան մոլի դարձաւ, որ մատներով օդին մէջ ֆրան-
սերէն բառեր ու նախադասութիւններ կազմեց։

Բայց ամէնէն աւելի կը սիրէր գրել առաջին դասին
սորվածը։

— Ճը սիւի փօք՛ր...
Մօր գարմանքը հիացումի և հիացումը երկիւղածու-
թեան կը փոխուէր ամէն անգամ, երբ կը տեսնէր, որ Վար-

դան իր հարցումներուն կը պատասխանէր բացարձակապէս անծանօթ, կարծես ճնճղուկներու լեզուով:

— Վարդան, քեզ մատաղ, այդ բոլորը ի՞նչպէս սորվեցար:

Կամ՝

— Վարդան, արեւիդ մեռնիմ, գաղղիերէ՞նն է դըժուար թէ նարեկը:

— Ի հարկէ՛ գաղղիերէ՞նը...

Բայց մարդ կար, մարդ ալ կար: Շատերը գաղղիերէն չէին կրնար սորվիլ եթէ նոյնիսկ էշի պոչը գետինը հասնելու չափ երկարէր: Վարդան անոնցմէ չէր: Վարդան առաջին իսկ դասին թափանցած էր լեզուի բոլոր նրբութիւններուն և գալտնիքներուն: Ինչեւէ:

Դատերը, սակայն, ուսուցիչ - ընկերոջ համար անակընկալորէն, չորս հինգ շաբաթ կանգ առին բոլորովին: Վարդան ա՛լ նախկին գլխակոտոր խանդավառութիւնը ցոյց չէր տար կարծես: Յետոյ սկսաւ աւելի ուշ գալ դասին և աւելի չուտ աւարտած համարել դասը: Օր յը զլիսու անտանելի ցաւը պատճառ բերաւ: Երկրորդ անգամ զեղեցիկ արեկար, պէտք էր բնութիւնը վայելել, զգալ և ներշնչուիլ: ուրիշ օր մը ոտանաւորները սրբագրելով զբաղած էր, և այսպէս անվերջ:

Ուսուցիչ-ընկերը ոչինչ կը հասկնար: Բայց իրողութիւնն այն էր, որ Վարդան չափազանց վրդովուած էր և վերին աստիճանի զժգոհ: Էր անկէ:

— Տգէտի՛ն, ապօւի՛ն մէկն է, կը մրթմրթար ինքնիրեն Վարդան: Ան ո՛վ, ինձի դաս առողջը ո՛վ... Դեռ հարց է թէ մեզմէ ո՛վ աւելի ֆրանսերէն գիտէ հիմա... Փրեզան, եմփարքի, փասէ տէֆինի, փասէ ենտէֆինի, փիւրիւո... Ասա՞նկ պիտի լեզու սորվեցնեն ինծի... «ին առաջ կրամմեր, Վարդան, կրամմե՛րը էն առաջ, ոտանաւորներուդ թարգմանութիւնը յետոյ, յետոյ»... Յիմարեանո՛ս, նախքան քերականութիւն ստեղծուիլը մարդի՛կ չէի՞ն խօսեր, ի՞նչ է... Յետոյ, բանաստեղծ մը ի՞նչ պէտք ունի քերականութեան: Ժը սիւի փօհ՛ք թէ վարդապետ, տխմա՞ր...

Մէկ խօսքով, Վարդանի գիտցածը բաւական էր իրեն: Աւելին յետո՛յ, յետո՛յ կը սորվէր, երբ հնարաւորութիւն ունենար ֆրանսացի ուսուցիչ մը վարձելու կամ Փարիզ երթալու: Զեղաւ ալ՝ ոչի՛նչ, առանձին մեծ բան մը չէր կորսնցներ: Նորվեկիացի գրող մը, որուն անունը Վարդան հիմա մոոցեր էր, բացի իր մայրենի լեզուէն ուրիշ ոչ մէկ լեզու գիտէր: Բայց ասիկա պատճառ մը եղած չէր, որպէսզի մարդը գրող մը, բանաստեղծ մը, այն ալ մեծ բանաստեղծ մը ըլլալէ դադրէր: Այնքան մեծ, որ բոլոր մացեալ եւրոպացիները գացեր նորվեկիացին սորվեր էին՝ անոր բանաստեղծութիւնները իրենց լեզուով թարգմանելու համար:

Եւ Վարդան ֆրանսերէնի տետրակներն ու գրքոյկը վերջնականապէս մէկդի նետեց և մատիտը ձեռքը առաւ, գըրելու համար այս անգամ այնքան գեղեցիկ մէկ բանաստեղծութիւն, որ նորվեկիացի բանաստեղծին համբաւը բերէր իրեն օր մը և յաջորդ օրը հարկադրէր ֆրանսացիներն և ուրիշները, որպէսզի, Վարդանի բանաստեղծութիւնները թարգմանելու սիրոյն, գան և հայերէն սորվին...

6.

Վարդան բնականաբար կը կարդար ալ: Աստուածաշունչը թերթատած էր անգամ մը, համբած էր քանի գլուխ և քանի էջ ունի, քթի տակէն ծիծաղած էր Երգ Երգոցի քանի մը տողերուն վրայ և ծալլած ու ընդմիշտ մէկ կողմ դրած էր:

Տեսական հարցեր չօշափող գիրքերը այնպիսի զգուանք կարթնցնէին իր մէջ, ինչպէս եթէ ձեր սուրձին մէջ քացախ խառնեն:

Պատմութեան վերաբերեալ գիրքերը կը բանար, խընամքով կը նայէր ու կը փնտոէր Մամիկոնեան ազգանունը: Կը կարդար այդ մասերը ու յաճախ գրքի հեղինակին հետ մեկուսի վէճի կը բռնուէր կամ քա՛ն քա՛ն կը ծիծաղէր անոր ագիտութեան վրայ:

Քաղաքին մէջ երեք զբաղարաններ կային և անոնց զբաղարանապետները, ինչպէս իրենք կ'ըսէին, եսիր կը ըստ էին վարդանի ձեռքը: Անոնց կարծիքով վարդան գիրքերը չէր կարդար, այլ կը լափէր պարզապէս: Վարդան կը կարդար գիրքերու խորագիրը, հեղինակին և հրատարակիչին անունները, նախարանին վրայ ակնարկ մը նետելով կ'անցնէր վերջարանին՝ կարդալով անոր առաջին և վերջին հատուածները, պահ մը կ'երազէր իր ապագայ գիրքերու մասին, յետոյ գիրքը անգամ մըն ալ թերթելով անոր ուղիղ կեղրոնը կը փնտոէր այնպիսի հետաքրքրութեամբ, ինչպիսի հետաքրքրութեամբ որ դուք ուզէիք երկրիս կեղրոնը գտնել. և էջ մը երկու կարդալէ ետք՝ գիրքը կը փակէր ընդմիշտ, մինչեւ որ շաբաթ մը վերջ ուրիշ գիրքերու դէզի մը հետ գրադարանապետին վերադարձնէր:

Դիրքերու խորագիրներն ալ իրենց յանցանքը ունէին: Ի՞նչպէս կարդար և ինչո՞ւ, օրինակ, գիրք մը, որուն անունը «Բոռ» է, կամ «Ճարպագունդ», կամ «Դաւիթ Կոպպերֆիլդ»... Ա՛յ, ուրիշ բան է օրինակ «Ծիլ ու ծաղիկ», «Ներենցումեն», «Խորտակուած կեանք», «Խելազարի Յոււասերը», «Անհունի Էջերում»... Ա՛յս, մանաւանդ այս վերջինը: Որքան բախտաւոր պիտի զգար ինքինքը Վարդան, եթէ այդ գրքի հեղինակը իրմէ առաջ անցած չըլլար: Այն ատեն անպատճա՞ռ, անպատճա՞ռ Վարդան իր անդրանիկ գրքի անունը «Անհունի Էջերում», պիտի դնէր: Բայց, ոչինչ, ինքինքը կը միմիթարէր վարդան, ես ալ իմ գրքիս անունը «Էջերի Անհունում» կը դնեմ: նոյնքան գեղեցիկ և վեհ ու վսեմ...

Կար մանաւանդ կանաչ կողքերով և «Երգեր ու Վերեր» խորագրով գիրք մը, որ Վարդանի համար նոյնն էր, ինչ որ է նարեկը անյոյս հիւանդներուն և Հաւատով խոսովանիմը հաղորդութենէ առաջ ապաշխարողներուն համար: Վարդան հիւանդ էր այդ գրքով: Այդ գրքի գրեթէ ամէն մէկ էջին վրայ տողեր ու բառեր կային, որոնք իրենց ջուրը Վարդանի սրտէն կը խմէին:

Վարդան կը պաշտէր այդ գիրքն ու անոր հեղինակը,

վասնզի անոնք իր բոլոր վէրքերը, դարտերը, մրմուռները կ'արձագանգէին: Բայց նաև թագուն կերպով կ'ատէր զանոնք, որովհետեւ անոնք իր բոլոր երգածն ու երգելիքը երգած էին արդէն՝ խորթ մօր մը նման ծամելու փշուր մը հաց իսկ չժողնելով իրեն:

Բայց, ամէն պարագայի տակ, երբ Վարդանի գրիչը, ուսանաւորներ ստեղծագործած պահերուն, թէև հազուազիւտ անգամ՝ բայց վերջապէս ուեւէ քմահամ յամառութեամբ կանգ առնէր ու յարմարագոյն յանգի պահանջը առաջաղոք, այն ատեն Վարդան սեղանին վրայ ամէնէն պատուաւոր, առաջաւոր և միշտ բացուած գիրքը գրաւող «Երգեր ու Վերեր» ուն կ'ուղղէր իր սրտաբեկ ու մտերմիկ հայեացքը և անկէ, ինչպէս եթէ սրտաբաց ընկերէ մը փոխառութիւն կնքէիր՝ փոխ կ'առնէր անուրջի համար մրմունջ մը, փուշի համար յուշ մը, կարկաչի համար մարմաջ մը, կոյսի համար յոյս մը և այսպէս հեշտ ու ընդերկար՝ ինչպէս հացն մեր հանապազօր...

7.

Մայիսը սէր ու խնդում բերաւ ամէնուն ու բոլորի սիրաը բերկրանքով լցցուց: Այնքան ծիլ ու ծաղիկներ կային, վազող ջուրեր, արև ու կապոյտ, կապոյտ երկինք: Բայց Վարդանի երգող տառապանքը յատկապէս մայիսին իր ամէնէն սուր և աղեկառուր ձայնը ձգեց իր ստանաւորներուն մէջ: Եթէ հիմա այդ ստանաւորները հնար ըլլար քամել, անոնցմէ աղի արցունքներ և Երգեր ու Վերերէն աւելի «ախաեր ու «վախ»եր պիտի հոսէին:

Ի՞նչ մայիս, երբ Վարդաննեց առաստաղէն անձրե կը կաթկթէր, իսկ Վարդանի սրտէն ախրութիւն: Եւ ի՞նչ գարուն, երբ Վարդանի մայրը գէթ տ առնիս ձուկէր կրնոր ձարել տղուն համար, մինչեռ Զատիկը եկած ու հանդիսաւորապէս ծոտած: Էր Վարդանի վրայ, որովհետեւ ան ոչ թէ ուեւէ նոր հագուստ, գլխարկ կամ կօշիկ գնել, այլ նոյնիսկ վազուց ծակծկուած կօշիկները կարկտնել տալ չէր կրնար:

Բայց ուրբաթը շաբաթէն շուտ եկաւ: Որ մը նոյնիսկ վարդանի մայրը սկսաւ լրջօրէն կասկածիլ — ինենթեցած չէ՞ր արդեօք վարդան: Իր սովորական դաշտային պատյառէն վերադարձին, Վարդան գրեթէ դուը կոտրելով ներս մտած էր, քամիի պէս վազելով փաթթուած էր մօրը փէշերուն, կուրծքին, գլխաշորը գրեթէ պատելով և ճչալով.

— Մայրիկ, մայրիկ, չե՞ս գիտեր, չե՞ս գիտեր, չե՞ս գիտեր թէ ի՞նչ է եղած...

Ու ամբողջ օրը ուրիշ ոչինչ ըսած էր և մայրը բնաւ հասկած չէր թէ ի՞նչ էր եղած: Միայն իրիկունը, սեղանին վրայ, սովորական թանապուրը խփշտելէ ետք, Վարդան վերջապէս օրհնեալ բերանը բացած էր և մօրը անվերջ թախանձանքին ի պատասխան՝ հատիկ հատիկ արտասանած.

— Տը-պա-րա-նը եկածէ...

Մայրը շատ լւա չեր հասկնար, թէև Վարդան յաճախ խօսած-բացատրած էր: Ու հիմա ալ Վարդան ստիպուած էր երկար ու երկար բացատրել, թէ քանի որ տպարանը եկած է, ուրեմն թերթ պիտի տպուի և քանի որ թերթ պիտի տպուի, ուրեմն և իր ոտանաւորներն ալ պիտի տպուին: Աւելին, Վարդան արդէն խօսած էր իր մեծ ընկերով և ընկերը խօսք տուած էր, որ եթէ ոպարանը դայ ու թերթը հրատարակուի, Վարդանը պաշտօնի պիտի կանչուի, էն քիչը, էն քիչը սրբագրիչ պիտի լիներուի, դուցէ նաև օդական խմբագիր: Տեսնե՞նք...

— Քեռի Սիմոնը իր էլ խելքով կ'ուզէր որ ես արհեստի մտնէի, ասոր անոր կօշիկը կարէի կամ վիզս ծոէի դերձակ Դուկասի մօտ ասեղ զարնէի, կը բրթբրթար Վարդան, այնքա՞ն նման իր հօրը, հանգուցեալ Մնացական աղային:

Ու կը շարունակէր.

— Քեռի Սիմոն ինծի և քեզի կ'ըսէր՝ սպասեցէ՞ք, կը կակլնաք՝ կ'ուտէք... Հը... Հիմա որ տպարանը եկաւ, տեսնենք մեզմէ ո՞վ կը կակլնայ կ'ուտէ... Սպասէ՛, քեռի, սպասէ՛. քու ոտանաւորներդ՝ կ'ըսէիր, իսկի բեռ

մը պատըուր *) չարժեն... Հը՛մ, ես այդ խօսքերը երթեք կը մոռնա՞մ... Սպասէ՛, երբ ամէն մէկ ոտանաւորիս հաս մը դեղին սակի ցնծան, նո՞ր այն ատեն կու զամ քեզի հետ կը խօսիմ...

Ու հիմա Վարդանն էր, որ լրջօրէն կը կասկածէր՝ չխենթեցա՞ւ արդեօք մայրը, որովհետեւ հիմա ալ մայրը անվերջ կը գրկէր, կը համբուրէր տղան շարունակ կրկնելով.

— Արեւիդ մեռնիմ, Վարդան, Ճի՞շտ կ'ըսես, ողորմածիկ հօրդ սրտի մուրազը եղա՞ւ, ըսէ՛, ըսէ՛, փիլիսոփայ իշելքիդ մեռնիմ, Ճի՞շտն ըսէ՛, տպարանը եկա՞ւ...

Այո՛, այո՛, տպարանը եկած էր:

8.

Տպարանի մեքենաները շարժման մէջ էին ու թերթը լոյս կը տեսնէր արդէն, բայց Վարդանի բոլոր չքեղ երազները և յոխորաւանքները փորը մնացեր էին: Յուսատու միծընկերը պարզապէս փայտէ զանակով սպաննած էր Վարդանը, վերջին անգամ յայտնելով.

— Վարդա՞ն, զա՞ռ, ի՞նչ ընեմ, այնքան կ'ըլլար որ աշխատեցայ, Կիկերոնի պէս ճառեր խօսեցայ, բայց չեղաւ՝ ի՞նչ ընեմ, սրբագրիչը արդէն վաղո՞ւց վարձած են...

Հիմա Վարդանին կը մնար սրտի ամբողջ տառապանքը մելանի վերածել և հոսող վշտի պէս փոել զանոնք տակաւին մաքուր ու անգիբը մնացած տետրակներու և թուղթերու ձերմակ էջերուն վրայ: Ի՞նչ, քաղաքին մէջ տպարան հիմնուէր, թերթ հրատարակուէր, և Վարդան նոյնիսկ սըրբագրի՞չը չըլլար անոր: Ուր ես, արդարութիւն...

Սակայն, անհնարին վիշտն ու անըմբոնելի անարդարութիւնը վերջնականապէս անդամալուծած չէին Վարդանի միշտ կենսունակ և որոճացող ուղեղը,

Անգամ մը, լուսաւոր մտքի մը անակնիւ ներխուժումէն զգլիսած՝ ծա՛փ տուաւ և ամբողջ օրը յատկացուց գրե-

*) Ոչխարի աղբ:

լու նամակ մը, թերթը հրատարակող մարմին, այս անդամ խնդրելով որ գրաշա՞ր վարձեն զի՞նքը տպարանին մէջ:

Ճիշտ է, ինք գրաշարութիւն ըրած չէ և հիմա ալ չի գիտեր, բայց իր լուսահոգի պապը, հանրածանօթ Մամիկոն, ժամանակին «Արծուի Վասպուրական»ը շարած է և վերջապէս ինք հետագային, ամիսէ մը, երկու շաբաթէն, թերեւ շաբաթէ մը կը սորվի: Ոչ երախայ է, ոչ տղէտ, ոչ ալ բթամիտ: Վերջապէս ամէն մարդ գիտէ թէ այսքան բանաստեղծութիւններ գրող Վարդան պիտի կրնայ գրաշար մը ըլլալ: Դրամ և վարձատրութիւն չ'ուզեր: Դրամ տան թէ չտան — մէկ է իրեն համար: Ինք կ'ուղէ միայն իր կոչումին բարձրութեան վրայ գտնուիլ, գրքի ու թերթի, տպարանի ու գրականութեան հետ կապուիլ, այլապէս... այլապէս կը կախուի, Աստուած վկայ, գամ մը և պարան մը կը գտնէ և կը կախուի...

Նամակը կարդաց, հաւեցաւ, սրբագրեց, կրկին կարդաց, բայց այս անդամ ինչ ինչ տողեր և բառեր գեղեցիկ չգտնելով, կրկին սրբագրեց, մինչև որ, վերջապէս, նամակի առաջին բառէն մինչև վերջինը բանաստեղծական համարելով՝ ծրարեց և գրեց հասցէն խոշոր տառերով ու վսեմ բառով:

Եւ որպէսզի իր գրաւոր խօսքին հետ բերանացի բարեխօս մըն ալ ունենայ, իր վերջին շրջանի ամէնէն տիսուր առանաւորները աետրակի մը մէջ ամփոփելով և Հելիկանքներ խորագրելով, ծօնեց իր մեծ ընկերոջ անունին: Ապա ծօնն ու նամակը անձամբ տարաւ յանձնեց և երբ տուն վերցարձաւ՝ այլեւս մարդ մըն էր, որուն կը սպասէր կամ կախաղանը, կամ թագաւորական գաճը:

Մեծ ընկերոջ բարեխօսութիւնը նախախնամական անձրեւի մը պէս կակուղցուցած էր թերթի հրատարակիչ մարդի չորցած, կորդացած սրտերը, և վերջապէս, Վարդան գրաշարութեան առնուած էր: Վեց ամիս ձրի պիտի ծառայէր և, իբրև վարձատրութիւն, գրաշարութիւն պիտի սորվէր:

Մեծ ընկերը ըստ էր.

— Սորվէ՛, Վարդան, սորվէ՛, գա՛ռս, պատուաւոր արհեստ է սորվածդ, վեց ամիսէն յետոյ կը նայինք, Աստուած ողորմած է, գուցէ ամսական կապենք, վրադ-գլուխըդ շտկես, մօրդ օգնես: Պզտիկ ասպարէզ չգիտնա՛ս, հա՛... Արդէն լուսահոգի պապդ ալ, ինչպէս կ'ըսես, թերթ շաբաթ է ժամանակին... Դէ՛, գառս, դէ՛, քեզ տեսնեմ, ինծի չամչցնես, կրկին կ'ըսեմ, պզտիկ ասպարէզ չըգիտնա՛ս...

Ո՞վ, Վարդան պզտիկ ասպարէզ կարծէր գրաշարութիւնը, գրքի ու գրականութեան հետ ամէն օր խաղան ու տառապիլը... Մեծ ընկերը գիշերը հակառակ կողմի վրա՞յ պառկած էր, ինչ է...:

Այդ գիշեր Վարդան անշուշտ չքնացաւ: Իսկ յաջորդ առաւօտը չսպասեց, որ մայրը այծը կթէր և սովորականին պէս տաք կաթը Վարդանի սեղանին վրայ դնէր:

— Ուշացա՛յ, կանչեց վրդովուած և, եօթը տարիներէ ի վեր իր սիրունիէն բաժնուած ու վերջապէս զայն տեսնելու բախտին ու հրաշքին արժանացած երիտասարդի մը պէս, գինով ու կիսախենթ, դուրս նետուեցաւ տունէն ու տպարանին ճամբան բռնեց:

Տպարանը դեռ փակ էր, աւա՛ղ: Դեռ նոյնիսկ արեւը ծագած չէր: Ոչի՞նչ: Ժամ մը երկու կը սպասէր:

Անհամբերութիւնը Վարդանի վզին պարան նետած, կը քաշէր դէպի այն պզտիկի թութակի վանդակին նմանող լուսամուտը, ուրկէ անդին տպարանն էր, մեքենաները, տպագրուած թուղթերու կտորները, սեղանները, իսկ անոնց վրայ մանրիկ մանրիկ տառեր թափթափ էին, կարծես սև մըջիւնները հինած բռնած էին: և վերջապէս, փոքրիկ աչքերով անթիւ արկղիկները, որոնք պէտք էր անպատճառ նոր տառերով լցուած ըլլային:

Աստուա՛ծ իմ, ուրեմն ժամ մը, երկու ժամ, թերեւ կէս ժամ ետք Վարդան այստե՛ղ պիտի ըլլար, պիտի աշխատէ՛ր հոս, իր սեփական ձեռքերով պիտի շօշափէ՛ր մեքենան, տառերը, այդ հրաշալի՛ տառերը, որոնք կարծես հնարուած էին յատկապէս Վարդանի ոտանաւորները շարե-

լու համար... կը թուէր, թէ գլուխը վզին շուրջ և հողը
տոքին տակ պար կը դառնային:

Եւ երբ Վարդան պտառող գլուխը կերպով մը իր բա-
րակ առանցքին վրայ պահել, կեցնել կը փորձէր, տեսաւ
պղտիկ հասակով, ըստ երեւոյթին ծեր ու անմազ, մէկ աչ-
քը գրեթէ կոյր մարդուկ մը, որ գաղտնի ստիկանի մը հե-
տաքրքրութեամբ կը դիտէր և ոտքէն մինչև գլուխը կը
չափչէր զինքը:

Դողութեան վրայ բռնուած յանցաւորի մը պէս զգա-
լով ինքինքը, Վարդան գոյն կու տար-կ'առնէր և մարդու-
կի հարցումին՝ «ի՞նչ գործ ունիս հոդ», կակաղելով հաղիւ
կրցաւ պատասխանել.

— Ո՛չի՞նչ, տը՛պ, տը՛պ, տը՛պ, տպա...

Մարդուկը լեզուն դուրս հանեց և ծաղրեց.

— Տը՛պ, տը՛պ, տը՛պ...

Ապա, մէջքին ետեւը պահած մահակը օդին մէջ բարձ-
րացնելով, սպառնաց.

— Հայտէ՛, հայտէ՛, ոա՛դ եղիր, թէ չէ գիտե՛ս, հա-
ա՛ա՛...

Վախէ՞ն թէ ամօթէն զարհուրած՝ Վարդան ինքինքը
քանի մը տասնեակ քայլ հեռու նետուած տեսաւ: Մինչդեռ
մարդուկը Վարդանի փախուստով աւելի քաջալերուած, ձեռ-
քի փայտը օդին մէջ կը ճօճէր սպառնական և կը բրթբըր-
թար.

— Տը՛պ, տը՛պ տը՛պ... ի՞նչ տը՛պ, տը՛պ ըսածդ
ի՞նչ է, ի՞նչ գործ ունիս հոս, հէ... ալը՛պ, տը՛պ, տը՛պ...
շուն շան որդի, ազգի տպարանը անտէ՞ր կարծեցիր, որ
մութ լուսուն եկեր ով գիտէ ի՞նչ կ'ուզես թոցնել... Հայ-
տէ՛, հայտէ՛, ոա՛դ եղիր, շուքդ չտեսնեմ, թէ չէ, Ասո-
ւած վկայ, որ մէյ մը զարկի, դդում գլուխդ հաւի վզիդ
վրայ չի մնար, հա՞ա՞ա...

Մարդուկի սպառնալիքը իր գործը տեսաւ և Վարդան,
հակառակ որ կարձլիկ ոտքերը իրարու կը փաթթուէին,
այսուամենայնիւ ինքինքը դտաւ դրացի նեղ փակուղիին
մէջ: Հոն յուսահատօրէն մէջքը տուաւ պատին և ապուշ

կտրած սկսաւ նայիլ վերը, դէմի բարձ: շէնքի լուսամու-
տին, ուրկէ աղջնակ մը լեզուն դուրս հանած կը ծաղրէր
զինքը:

Վերջապէ՛ս, տպարանի դուռը բաց էր հիմա ու ոչ
միայն քիչ առաջուան կարձլիկ մարդն ու իր ստուերը չկա-
յին հոն, այլեւ բացուած դսւռնէն Վարդան կը տեսնէր եր-
կու նիհար ու չոր երիտասարդներ, որոնք կը յօրանջէին,
կը ծմրկային ու թեւերնին լայն լայն կը բանային:
Անտարակոյս գրաշարներն էին:

Վախով և երկիրւածութեամբ, եկեղեցի մտնող աղօ-
թաւորի մը պէս, մարդան, քայլերը կամաց ու անշուկ
փոխելով, մօտեցաւ զրան ու խոչոր գլուխը զգուչօրէն ներս
երկարեց:

Երկու երիտասարդները նախ ոչինչ նկատեցին, ապա
անոնցմէ մէկը, որ անվերջ կը հազար, խէթ խէթ նայեցաւ
Վարդանին, անոր վրայ գլուխին, ու չճանչնալով կամ ո-
չինչ հասկնալով՝ դիմեց իր ընկերոջ, որ հաւանաբար պաշ-
տօնով և ոռծիկով մեծ էր իրմէն:

— Ո՞վ է սա եաբանին, հարցաւց:

Ընկերը, որ կը շարունակէր յօրանջել և թեւերը լայն
լայն քանալ, զեռ յօրանջը չաւարտած՝ «ի՞նչ կ'ուզես, օ-
դուլուլ», ըստ անտարքեր ձայնով, կարծես թէ ճանճ քշէր
քթին վրայէն:

Այս պարզ հարցումին պատասխանելը Վարդանի հա-
մար աւելի զիււար եկաւ, քան քերականութեան ուսուց-
չին քննութեան ներկայանալը: ի՞նչպէս թէ ինչ կ'ուզէր:
Եթէ ասիկա տպարանն էր, եթէ ասոնք զրաշարներ էին և
եթէ ինք Վարդանն էր, ուրեմն ի՞նչպէս կարելի էր նման
հարցեր ուզգել իրեն...

Այսպէս կամ այնպէս, հակառակ իր բոլոր ճիգերուն,
Վարդան իսկոյն պատասխանել չկրցաւ:

Կացութիւնը փրկեց դարձեալ աւագ գրաշարը:

— Հել՛ մէյ մը ներս եկուր տեսնեմ, ո՞վ ես և ի՞նչ
կ'ուզես... ներս եկուր, օդուլ, մի՛ վախնար, շենք սպան-
ներ...

— Ո՞ր գեղէն ես, ցա՞խ կը ծախես թէ պաշտուր,
սիրտ առաւ և հարցուց հազացող գրաշարը:

Վարդան ակամայ յիշեց Քեռի Սիմոնի ծաղրը և աւելի եւս գոյն տուաւ առաւ:

— Հայերէն չե՞ս գիտեր... Զըսե՞ս ինչ կ'ուզես, օ. դո՛ւլ...

Այս արդէն սարսափելի էր:

Վարդանի լեզուն խօսադուլ յայտարարած ըլլար կարծես:

Աւագ գրաշարը ինքնիրմէ ելած էր ալ: Ան վերջ տըւաւ իր մեղկ յօրանջին և փափուկ հարցումներուն ու, շեշտակի ուղղուելով գէպի Վարդանը, անոր թեւէն բռնեց, գրեթէ ուժով ներս քաշեց, դուռը ետեւէն փակեց՝ կարծես վախնալով որ Վարդան կը փախչի՝ ու քանի մը անզամ թեւը ամուր ցնցելով հարցուց.

— Առուու կանուխ էշի ականջի պէս տնկուած ես տուշեւս, ի՞նչ կ'ուզես, օղուլ, լա՞լ ես, ի՞նչ է...

Ցնցումը փրկարար եղաւ: Աւագ գրաշարը կարծես Վարդանի թեւը չէր որ կը ցնցէր, այլ լեզուն, որ ընդարձացած, շփումի և ցնցումի կը սպասէր՝ վերջապէս բերնին մէջ դառնալու և բարբառելու համար:

Եւ ինքնապաշտպանութեան գրեթէ ընազդական մղումով, Վարդան, ճիշտ է, սկիզբը կամաց, հազիւ լսելի ձայնով ու յաճախ թուքը կուլ տալով, կակազելով, բայց տակաւ աւելի ու աւելի բարձր, և աւելի ու աւելի արագ պատմեց գործին էութիւնը և յաջողութեամբ պատասխանեց գրաշարներու բոլոր հարցումներուն, ցրելով անոնց բոլոր

եւ երբ Վարդան յատակօրէն ինքզինքը ներկայացուցած էր, գրաշարները իրար աչքով ըրին, հասկցան զիրար ու արմատապէս որոշեցին իրենց վերաբերմունքը գէպի նուրելուկ գրաշարը:

— Կեց ամիսը ահագին ժամանակ է, օղուլ, հայրաբար ըսաւ աւագ գրաշարը, դուն ինթիլիկենո մարդ ես, շա՞տ շուտ կը սորվիս, դէ՛ հիմա վազէ աղբիւր փարչ մը

ջուր բեր, բնաւ չմտածես, շա՞տ շուտ կը սորվիս, օղուլ...

Այդ օրը Վարդան հինգ անգամ վազեց աղբիւրը ջուր բերելու. հազացող գրաշարին համար գնաց ծխախոտ գնեց, մէկ քանի անգամ նկատողութիւն ստացաւ աւագ գրաշարէն՝ անոր ուաքին տակը իյնալուն համար. պարապ մեքենան գարձնելու վարժութիւն ըրաւ, գրաշարներուն խնդուք պատճառելով. սեփական ձեռքերով չօշափեց մանրիկ տառերը և համրեց անոնց արկղիկները. քիթն ու բերանը մրտեց. գիշերուան անձկութիւնը, առտուան անախորժ միջադէպը, ամբողջ օրով անօթութիւնը մոռցաւ, իսկ իրիկունը, ցաւով ու ափոսանքով թողուց տպարանը: Տուն հասնելով ինքնիրմէ ելած գրկեց քոյրը, մօրը վզովն ինկաւ, լացաւ անոր հետ և քանի մը դգալ թանապուր խմելէ ու գլուխ մը երկու կարմիր բողկ ալիին մէջ թաթիսելով խը՛րթ, խը՛րթ կրծելէ ետք՝ անցաւ իր հայելիին և գրասեղանին առջև և ընթացիկ յուշատեարը բանալով՝ իմ կեանիք ամենեն լուսաւոր օրը խորագրին տակ խանդավառ էջեր գրեց...

9.

Ցաջորդ օրերուն և շաբաթներուն արդէն տպարանը Վարդանի համար նոյնն էր, ինչ որ տաճարը լուսարարին համար: Ճիշտ է, թերթի Հրատարակիչ Մարմինը մերժեց Վարդանի բուռն թախանձանքը՝ գիշերները տպարանը քնանալու մասին, բայց և այնպէս, ի հեծուկս, Աստծու ամէն օր, տպարանի սեմը առաջին և վերջին կոխողը Վարդանը եղաւ:

Առաջին օրուան պէս, Վարդան առանց սովորական կաթը իմելու տպարան վազեց՝ բաւականանալով ճանապարհին տիխը, ժաժիկը և հացը իրար ուրուծ կրծոտելուելով: Տպարանին մէջ ամէն աշխատանք, ինչպէս կ'ըսէր, վեհ էր և սուրբ: Տպարան՝ տաճար գիտութեան: Ատոր համար ալ ամէն օր, յաճախ օրը մէկ քանի անզամ, աւելը ձեռքը կը սրբէր, կը մաքրէր տպարանի ներսն ու գուրսը, ջուր կը բերէր, գրաշարներուն համար հաց, ծխախոտ ու

պտուղ գնելու կ'երթար, Յետոյ, մելան կը քսէր մամուլին, մեքենան կը դարձնէր, տառերու արկղիկները հոսկէ հոն կը փոխադրէր, թերթերը կը ծալէր, կը համրէր, Բուն գըրաշարութիւնը, ինչպէս նաև ոռծիկը, գրեթէ բոլորովին չէին շահագրգուր զինքը: Կենսականը տպարանին մէջ աշխատիլն էր: Կարեւորը այն էր, որ Վարդանի բոլոր բարեկամներն ու չարակամները, Մեծ Աղայէն մինչև Քեռի Սիմոն, տեսնէին թէ ա:ա ուր է ինկած Վարդան և ուր, մինչև ուր հասած...

Դուրսը, ասոր անոր հետ խօսած պտհուն, Վարդան կը պատմէր տպարանի բոլոր հրապոյրները: ան գիտէր բոլոր կեղծանուններով ստորագրուած յօղուածներու իսկական հեղինակները. գիտէր թէ ո՞վ գրած է խմբագրական անստորագիր յօղուածը, ո՞վ է թատրոններու մասին գրողը, որո՞նք են թղթակիցները: Ու այնքան բծախնդիր էր տպարանի բոլոր գաղտնիքներուն և մանրամասնութիւններուն, որ համրած էր և ճշորէն գիտէր թէ թերթի ամէն տողը քանի տառ ունի, ամէն մէկ սիւնակը քանի տող և ուրեմն թերթը ընդամէնը քանի սիւնակ, քանի տող ու քանի տառ ունի...

«Մեր տպարանը, մեր գրաշարները, մեր թերթը, մեր խմբագիրը» կ'ըսէր ան, տպարան մտնելու առաջին չարաթներուն, Վերջը, անզգալար և առանց ուեէ գէշ գիտաւորութեան, մերը փոխեց իմ-ի:

- Իմ տպարանը նոր մեքենաներ պիտի ունենայ:
- Իմ գրաշարները շատ աշխատասէր են:
- Իմ թերթը 500 օրինակ կը տպուի:
- Իմ խմբագիրը քիչ մը հիւնադ է...

Կ'ըսէր ան գրեթէ ամէն առիթով և ամէնուն՝ մօրը, ընկերներուն, նոյնիսկ Քեռի Սիմոնին, Ու մայրն ալ նոյնն էր.

— Մեր Վարդանի թերթը գրած էր, թէ պատերազմի վախ կայ:

Միամիտները կը նախանձէին կամ կը հիւնային, իսկ վատերը, նախանձորդները, ետեւէն ու առջեւէն կը ծաղրէին կամ կը բամբասէին:

— Տղադ ի՞նչ կը ստանայ տպարանէն, կը հարցնէին երբեմն հեռու և մտ ծանօթները:

— Հիմա ամիսը երեք ոսկի, բայց աշնան պիտի աւելցնեն, հինգ ոսկի չինեն, կը ստէր բարի ու միամիտ մայրը: Ու, անդշաղառնալով իր սուտին, ինքզինքը կը համոզէր մտովի:

— Թո՛ղ աչքերնին դուրս գայ, թո՛ղ տեսնեն որ ես ու աղաս փառքի մէջ կը լողանք...

Ու այդ օրերուն, դրացիէն հաւկիթ մը երկու փոխառած, Վարդանի տպարանէն ուշ վերադարձին՝ կ'ըսէր.

— Խելքիդ-գրչիդ մեռնիմ, Վարդան, ձուածեղ մը եւ փեմ կե՛ր:

Վարդան չէր մերժեր:

Չուածեղը կ'ուտէր, բայց իւրաքանչիւր համեղ պատառին հետ կարծես տրառում հոգին էր որ կուլ կու տար:

Տագնապի մէջ էր: Արդէն երկու ամիս անցած էր, բայց խմբագրապետին ուղարկած իր երեսունէ աւելի ոտանաւորներէն ոչ մէկը տպուած էր: Ի զուր Վարդան խըմբագրապետին անունով տպարան ղրկուած բոլոր ձեռագիրներուն մէջ վնտուած էր իր ոտանաւորներէն գէթ մէկը: Աստուած իմ, ինք կը կարծէր, թէ առնուազն հինգ հինգ, գէթ զոյգ զոյգ, իւրաքանչիւր համարին մէջ պիտի տպուէին անոնք, շեղագիր տառերով, թերթի առաջին էջին վրայ, կամ գէթ իրենց սովորական տեղը, թերթօնի բամբին վերը, մինչզեռ հիմա, ուղղակի ամրող ամիսներ կ'անցնէին և ահա անոնցմէ նոյնիսկ հատ մը, սիրուն ու խատուտիկ թիթեռնիկի մը պէս իր ճըլպըլառուն թեւերը չէր բանար թերթի ուեւէ սիւնակին վրայ...

Ի՞նչ ընէր: Թերեւս խմբագրապետին կողմէ կարգի դրուած էին անոնք ու հերթի կը սպասէին: Թերեւս իր լրկած ոտանաւորները, բացառաբար սիրոյ, վշտի և բնութեան նուիրուած ըլլալուն համար, խմբագրապետին ճաշակովը չէին: Վերջին «թերեւս»ը աւելի հաւանական համարելով, օր մը, տուն վերադարձին, ամբողջ գրերը նստաւ, առջեւը փոխեց ոտանաւորներով լեցուն տետրակներուն զէզե-

րը և անոնցմէ մէկիկ մէկիկ ջոկջկեց տասներկու զուտ ազգային, հայրենասիրական, քիչ մըն ալ մարտական ու յեղափոխական բովանդակութեամբ ոտանաւորներ, յաքուրի քաշեց, բոլորը առանձին առանձին ստորագրեց և մեծ ու գեղեցիկ ծրարի մը մէջ ներփակեց. Ապա երկար, ողոքիչ նամակ մը ուղղեց խմբագրապետին, չծածկելով իր հիացումը անոր տաղանդի և մեծութեան, իր պաշտամունքը գրականութեան հանդէպ, ինչպէս նաև քանի մը հակիրճ կենսագրական գիծեր իր գրական անունի և Մամիկոնեան իր ազգաստոհմի մասին. Յետոյ ծրարին վրայ մեծ և վայելուչ տառերով գրեց խմբագրապետին ու թերթին հասցէն՝

Պարոն Միհայիլ Վարդապետեան
Քաջահմուտն եւ հաջատումիկ խմբագրապետն
ՏԱՐԱՊԱՆԻ Շաբարերը
Վասպուրական Աշխարհի
որ ի Վանեանն Այգեստան

Վարդան, անյիշաչար ու ներողամիտ, ամիս մը սպասեց, բայց ամէն շաբաթ իրար յաջորդող Տառապանի համարները իր տառապանքը կրկնապատկեցին միայն. Ամէն մէկ աննշան դէպքի մասին լուրեր և թղթակցութիւններ, նոյն իսկ իրենց խանութը փոխողներու կամ նոր ամուսնացողներու և ամիս մը առաջ մեռնողներու ծանուցումներն ու յայտարարութիւնները խոչըր ու շքեղ տառերով կը տպուէին, իսկ Վարդանի ոտանաւորներէն ոչ իսկ տո՞ղ մը...

Ի բնէ լաւատես՝ ենթագրեց և մեծապէս հաւանական գտաւ թէ, խմբագրապետը կրնար իր ոտանաւորները հաւաքել և առանձին հատորով մը հրատարակել. Անշուշտ, այդ էր պատճառը, այլապէս ոչ Սստուած և ոչ Սատանան կրնային հասկնալ կամ բացատրել թէ ինչո՞ւ իր ոտանաւորները, այն ալ ազգային ու հայրենասիրական բովանդակութեամբ, պիտի չտպուէին թերթին մէջ. Ուստի դիմեց նորէն իր մեծ ընկերոջ և սիրտը բացաւ անոր առջև, թէն ձանապարհին մտադրած էր ընկերոջը գանգատիլ, բայց վերջը որոշեց, ինչպէս ինք կ'ըսէր, դիւանագիտօրէն շարժիլ և հարցուց մտերմօրէն.

— Պարօն խմբագրապետը քեզի բան մը չըսա՞ւ իմ գիրքիս մասին:

Ընկերը ապշեցաւ, ի՞նչ գիրք:

Եւ երբ Վարդան ինքինքը հասկցնել տուաւ, ընկերը չկրցաւ իր քրքիջը զապել, բայց յետոյ մեղքցաւ ու մտերմօրէն ըսաւ.

— Խելքդ հացիդ հետ կերա՞ր, Վարդան:

Ու նկատելով որ ան կը պատրաստուի ուղղակի լալու, աւելի մեղմացած ըսաւ.

— Մի տիրիր, զառս: Յետոյ, քեզի բան մը ըսե՞մ, դուն շա՞տ կ'աճապարես: Տե՛ս, Տիգրան վարժապետը մինչեւ որ գրելով աչքերը չկուրցուց, իր գրքի հրատարակութիւնը չաեսաւ, զուն տակաւին ուր կը մնաս, գա՞սս, զուն տակաւին քան տարեկան ալ չկաս. . . Իսկ ինչ կը վերաբերի ոտանաւորներուդ թերթին մէջ տպուելուն, օր մը կը տպեն հարկաւ, շատ մի մտածեր, գա՞սս:

Այդ երանելի օրը երբեք չեկաւ, սակայն, ու Վարդանի ի բնէ խաղաղ, անչար հոգին, հիմա յուսահատութենէ աւելի կատղած էր խմբագրապետին դէմ, որու հմտութիւնն ու համբաւը ուղղակի ոչինչ էր այլեւս Վարդանի համար, զէրօ. . .

Վարդան հիմա նոյնիսկ կը տեսնէր թէ խմբագրապետը այնքան ալ լաւ չի գրեր, յամենայն դէպս մեծ դժուարութեամբ կը գրէ, քանի որ, գրեթէ միշտ, խմբագրապետը յօդուածը բովանդակող ձեռագիրը ուղղակի խզրզուած էր: Նոյնիսկ խմբագրապետը ինքը իր գրածը չէր հաւեներ ու թղթի վրայ գրածին մեծ մասը կը ջնջէր: Եւ վերջապէս Վարդան սկսաւ խմբագրապետի յօդուածներուն մէջ սիսալներ բռնել: Այն ալ ի՞նչ սիսալ, Աստուած իմ: Խմբագրապետը իր մէկ խմբագրականին մէջ գրած էր հայութեան տագնապը, ու տագնապը գ-ով գրած էր: Յիմա՞ր. . . Եւ Վարդան իր պարտականութիւնը համարեց աւագ գրաշարին թեւալդրել, որ տագնապի գ-ը բ-ի վերածէ:

— Գործիդ գնա՞ւ, օղո՞ւլ, սասանց աւագ գրաշարը, թանի ձանձի պէս ամէն բանի մէջ մ'իյնար, ինչ' ալ կօ-

շիկէղ վեր մ՞ելլեր, քեզի ըսին գնա երկու հաս վարունդ և քիչ մը ժամփիկ առ բեր, իսկ դուն հոս գլխուս նորէն վարժապետութիւնն սկսար...

— Քեզ ինչ կ'ըսն ա՛ն ըրէ, ձայն տուաւ անդիէն հազացող զրաշարը, առ փարչը բեր ջուր խմել, ծարաւ մեռա՛նք...

Վարդան, տրտունչն ու բողոքը փորը ձգած, մէկդի կը քաշուէր գրաշարներուն սպասաւորելու:

10.

Մեծ ճիգերով ու անհնարին դժուարութիւններ յաղթահարելով, Վարդան ծանօթացեր էր վերջապէս տառերու արկղիկներու սատանայական դաղանիքներուն: Ան հիմա, թէս քիչ մը դանդաղ, բայց կրնար իր ուզած տառը գըտնել հանել արկղիկներէն: Տառերը հանելէ ետք, գիտէր զանոնք աջ ձեռքին մէջ դասաւորել, և երբ առաջին անգամ յաջողեցաւ իր անունն ու ազգանունը առանց թափթիելու շարել ու ափին մէջ բռնել, հոգին սիրամարգի մը պէս պրճնուեցաւ: Վերջապէ՛ս, կը մնար այդ սատուածային տառերը այնպէս մը ամուր կապել, որ յաւիտեանս յաւիտենից իրարմէ չբաժնուէին: Վասնզի եթէ այդ տառերուն վրայ քիչ մը մելան քսէր և զանոնք ուզած ուղղութեամբ սպիտակ թռւղթի վրայ սեղմէր, կ'ունենար իր անունն ու ազգանունը արդէն տպագրուա՛ծ...

Ու, իր կեանքին մէջ առաջին անգամ ըլլալով, Վարդան գողութեան դիմեց: Գրաշարներէն գաղտնի անիկա տառերը առւնը փոխադրեց, թէս ամբողջ օրը բռնուելու սարսափին տակ: Հիմա բոլոր տեարակները, անոնց մէջ խոնուազ բոլոր ոտանաւորները տպագրուած ստորագրութիւններ ունէին: Վարդանի տպագիր անունն ու ազգանը, ալիւրի պատրաստի խմորով փակցուած թռւղթի մեծ կամ պատիկ պատառիկներու վրայ, կը զարդարէր իր սենեակի դրան մուտքը, սենեակին պատերու ցցուն անկիւնները, հայելիի շրջանակը, հօրը, հանգուցեալ Մնացական ա-

դայի և Խրիմեան Հայրիկի նկարները, իր ունեցած գրքերը, իր աթոռի մէջքն ու նստատեղը, ամէ՛ն, ամէ՛ն տեղ...

Ոգեւորութիւնը, ինչպէս երբեմն, պատանի օրերուն, կատղեցաւ նորէն: Միայն անուն աղքանունի տպագրութիւնը չբաւարարեցին զինքը: Իր ուղեղին պարտադրած բոլոր հնարքները փորձած էր ոտանաւորներէն զէթ մէկը տպելու եթէ ոչ թերթին մէջ, այլ գոնէ առանձին, թղթի պատառիկի մը վրայ, բայց չէր յաջողած: Ուղեղի ամէն հրամանը ձեռքը չի կրնար գործադրել միշտ, և եթէ Վարդանի ուղեղը կանխահասօրէն զարգացած ու առաջընթաց էր, ձեռքերը նախնական էին, դանդաղ ու ձախլիկ: Ոտանաւորի վերնագիրը հազիւ շարած և առաջին աողը նոր ըսկած, տառերը կը թափէին կամ թէ գրաշարներէն մէկն ու մէկը կը գոռար.

— Նորէ՞ն այդ տառերուն հետ խաղուլ սկսար:

Սկսաւ կակդիլ և յոյսը դնել նորէն խմբագրապետին վրայ: Կրկին ոտանաւորներ գրեց և նամակներ ուղղեց անոր և, չես գիտեր ինչու, այս անգամ այնքա՞ն վստահ էր իր ոտանաւորներու տպուելուն, որ գրեթէ ամէնուն, մանաւանդ մօրը համոզեց թէ առաջիկա! շաբաթ օրուան թիւին մէջ լոյս պիտի տեսնէ իր ոտանաւորը:

Առաջիկայ շաբաթ օրը եկաւ, Տառապանէը ուվորական կերպով լոյս տեսաւ, բայց փոխանակ Վարդանի ոտանաւորին, այս անգամ տպուած էր պզտիկ ոտանաւորը անոր մէկ մեծ ընկերոջ, որուն զրական կեղծ անունը «Սիրտ մը բարին տակ» էր: Վարդանի համար պարզ էր, որ խմբագրապետը այդ ոտանաւորը պիտի չտպէր, եթէ անոր հեղինակը իր մօտաւոր ազգականը չըլլար...

— Ազգին թերթը խնամիական հաշիւներու կը ծառայեցնէ, կ'ու զէր ամբողջ աշխարհովը մէկ ճչալ Վարդան, բայց վախնալով թէ իրբե զրպարտիչ տպարանէն պիտի արձակէին զինքը, խելօքութիւն համարեց ոչ ոքի ոչինչ ըսել և ցաւը տամին տակ սեղմել:

Բայց եթէ ուրիշները, մանաւանդ Քեռի Սիմոն բոլորվին անտարբեր էին թէ Վարդանի ոտանաւորը Տառ-

պանքի մէջ լոյս կը տեսնէր կամ ոչ, վարդանի մայրը, սահայն, այդ օրը տօնական տրամադրութիւն ունէր և տղուվերագարձին կը սպասէր մեծ անձկութեամբ, կարծես թէ Վարդան ոչ թէ տպարանէն իբրև գրաշար, այլ եկեղեցիէն կը վերադառնար իբրև նորափեսայ:

Եւ նոյն օրը.

— Բերի՞ր, վարդան, թո՞ղ մէյ մը աչքերովս տեսնեմ տպուած ոտանաւորդ...

Մօրը աղաչական հարցումին ի պատասխան՝ Վարդանի սիրտը կտոր եղաւ և ան, ստիպուած, գէթ մայրը վերջնականապէս չյուսաբեկելու համար, ընկերոջ տպուած ոտանաւորը կարդաց իբրև իբրը...

Վարդանի անդրագէտ մայրը կը հաւատար, ուրախութեան արցունքներու մէջ կը խեղդուէր, դողացող մատներով կը վերցնէր ոտանաւորը, սրբազն նշխարի մը պէս կը համբուրէր, երեսին կը քսէր և ձեռքը վերը, գէպի երկինք ու Աստուած պարզած՝ կ'ըսէր.

— Փա՛ռք քեզ, Աստուած, փա՛ռք քեզ, որ այս ալ տեսանք, փառքիդ մեռնիմ, Տէր, որ տղաս ալ փառաւորեցիր...

Ու անմիջապէս կը յիշէր վաղահաս մեռնող իր ամուսինը, Մնացական աղան:

— Ա՛խ, իմ մեղքն էր, իմ մեղքը, որ ողորմածիկ հայրը ողջ չմնաց... Մնայիր տեսնէիր, թէ ազիզ Վարդանիկդ ի՞նչ փառքի մէջ է հիմա, մնայի՛ր, տեսնէի՛ր, կարդայի՛ր տղուդ ոտաւորը: (Վարդանի մայրը ոտանաւորը ոտաւոր կ'արտասանէր յաճախ, հակառակ Վարդանի երեխն բարեացակամ, երեխն ալ ուղղակի ցասումնալի ուղղումներուն):

Մօր յուղումը վարակիչ էր ու Վարդան գրեթէ ինքն ալ կու լար, բայց անոր սրտէն արիւն կը հոսէր: Ինչո՞ւ, ինչո՞ւ այսպէս խաբէր մայրը և ուրիշի ոտանաւորը կարդար իբրև իր սեփականը, երբ իսկապէս ինքն ալ իրը ունէր, աւելի շատ և շատ աւելի գեղեցիկ... ի բնէ բարի, աշխարհի ու մարդոց դէմ երեխն ոչ մէկ թշնամութիւն ու ատելութիւն սնուցանող Վարդան, հիմա լուռ կատաղու-

թեամբ լեցուած էր մասնաւորաբար խմբագրապետին զէմ, որ, պարզ է, խնամիութիւն կ'ընէր և տգէտի ու անձարակի մէկն էր...

Ա՛խ, ինչպէս կ'ուզէր որ այդ խմբագրապետը հիւանդանար, կամ պաշտօնանկ ըլլար, կամ, այո՛, այո՛, նոյն իսկ մեռնէր, որպէսզի վերջապէս ուրիշ մը գար փոխարինելու զայն ու տպէր վերջապէս իր ոտանաւորները...

||.

Բայց Վարդան գիտէր, որ եթէ ձեռքերը ծալլած նըստէր՝ սպասելով քաջակորով ու զեռ երիտասարդ խմբագրապետի պաշտօնանկ ըլլալուն կամ մեռնելուն՝ աւելի չուտ իր աչքերուն մէջ մազ պիտի բուսնէր, քան թէ Տառապանեին մէջ տպուէին իր ոտանաւորները...

Ու նորէն յոյսը զրաւ իր գործող ուղեղին վրայ: Գիշեր մը հոյակապ ծրագիր մը յղացաւ և յաջորդ օրը անվարան գործադրութեան դրաւ զայն: Ամէն երկուշաբթի ձեռագիրներու մեծ կապոց մը կը բերուէր տպարան և գրաշարները անփոյթ կը նետէին զայն հոս ու հոն, օրերու ընթացքին կամաց կամաց շարելով: Վարդան իր ամէնէն յաջող և տպուելու համար ոչ մէկ առարկութիւն վերցնող չորս առաննոց ոտանաւորը, առանց ոչ ոքէ նկատուելու, սիրտը դող, բայց վերին աստիճանի զգոյշ, սահեցուց ձեռագիրներու այդ կապոցին մէջ, իբր թէ խմբագրապետէն ուղարկուած ըլլար ան...

Ու ամբողջ օրեր, երկունքէ բոնուած մօր մը նման, կը սպասէր ճակատագրական վայրկեանին, երբ պիտի վերջապէս թերթը լոյս տեսնէր այս անգամ ոչ թէ իր նախկին անհամ անհոտ բովանդակութեամբ և Վարդանի կօշիկի կրունկը չարժող յօդուածներով և ոտանաւորներով, այլ իրեն, Վարդանի բանաստեղծութեամբ զարդարուած, ճոխացած, գեղեցկացած...

Հակառակ ներքին անծանօթ սարսափին և ճնճղուկի պէս թպտացող սրտի զողերուն՝ Վարդան իր յաղթանակի

ապահովութիւնն զգացող ռազմիկի մը տրամադրութիւնն ունէր: Իսկ երբ տեսաւ որ, երկու օր ետք, աւագ գրաշարը երկու մրոտ մատներով բռնեց իր ոտանաւորը և զնաց կանգնեցաւ շեղագիր տառեր պարունակող արկղիկին քով և երկու անգամ փոնդտալէ ետք սկսաւ շարել.

— Խէ՛ր է, ցնծաց Վարդան և ոտքերուն վրայ օրօրուելով, իր կամքէն անկախ, զարնուեցաւ հազացող գրաշարին:

Գրաշարը երկար և խէթ խէթ նայեցաւ Վարդանին ու, առանց ըմբռնել կարենալու անոր հոգիի բովանդակ ալեկոծութիւնը, աղտօտ հայնոյանք մը արձակեց:

Վարդանի հոգին բաւական շատ ցնծուն էր, որպէսզի ան ներէր զինք հայնոյողը: Ու այնքան քնքուշ ու ներող էր անոր հոգին հիմա, որ հայնոյանքը լսելէ ետք, նոյնիսկ ինքը ըստաւ.

— Ներեցէ՛ք, կ'աղաչեմ, ներեցէ՛ք:

— Դէ գնա՞աա, սարսա՞իս, մրթճրթաց գրաշարը ու ձեռքը այնպէս մը թափ տուաւ, կարծես Վարդան ըլլար մէկը այն աներես ճանձերէն, որ պնակիդ շուրջը անվերջ կը դառնայ ու կը բզզայ, պարզապէս խանգարելով որ հանդարտ սրտով թանապուրդ սւտես:

Բայց Վարդանի մտքերը ուրիշ՝ տեղ էին բոլորովին, Անոր սիրտն ու միտքը, անոր յոյսն ու փառքն ու ապագան այս րոպէիս աւագ գրաշարի մրոտ մատներուն տակ էին, տպարանի մէկ մութ անկիւնը, փայտէ անթիւ ծակերով բացուած արկղիկներուն վրայ: Ոտքի ծայրերուն վրայ բարձրացած՝ Վարդան վիզը կը ձկէր, կ'երկարէր ու անհամբեր կը նայէր հոն, աւագ գրաշարի արագ արագ գարճող մատներուն ու այդ մատներուն մէջ երբեմն վար քաշուող ու երբեմն վեր քշուող թուղթի այն կտորին, ուր Վարդանի խնամոտ ձեռքերով գրուած էր ոտանաւորը: Եւ գրաշարի մատները, աչքերը, ինքը գրաշարը ամբողջ էութեամբ Վարդանի համար հիմա սիրելի, համբուրելի, պաշտելի էին... Անոր հանդէպ Վարդան հիմա որդիական յարգանք ու պատկառանք յիայն կը զգար: Ան հիմա պատրաստ էր ոչ

միայն աղբիւրէն ջաւը բերելու անոր համար, կամ ժաժիկ ու ծխախոտ գնելու, այլ և իր հագուստները հանելու և անոր տալու, անոր տալու ամէն, ամէն բան, նոյնիսկ ջուրը նետուելու անոր համար...

Վարդան տեսաւ անգամ մը, որ գրաշարը գլուխը օրորեց ու աջ ձեռքը հարցականօրէն օդին մէջ տնկեց: Պա՛րզ էր, գրաշարը հիացած էր: Անշո՛ւտ: Տասներկու տարուան գրաշար, ան թերեւս առաջին անգամը նման գեղեցիկ բանաստեղծութիւն մը կը շարէր: Պարզ էր, գրաշարը հիացած էր, կը մտածէր Վարդան ու կը դարձար երթալ, փաթթուիլ անոր վզով ու հեկեկալ:

— Աւա՛գ, սիրելիս, իմ մե՛ծ, մե՛ծ ընկերս, ե՛ս, ե՛ս եմ գրած: Այդ բանաստեղծութիւնը, զոր հիմա կը շարես և որուն վրայ այդքան կը հիանաս, ի՛մն է, ի՛մը...

Թերեւս Վարդան կատարէր իր իղձը և երթար փաթթուէր աւագ գրաշարին, եթէ անդիէն հազացող գրաշարը ձայն չտար իր ընկերոջ:

— Այդ ի՞նչ կը շարես, ես իմ այս անտէր խմբագրականը պրծայ, եկուր թերթին երեսը կապէ...:

— Ի՞նչ կը շարեմ, քրթմնջաց աւագ գրաշարը, որ արդէն իր հերթին շարած վերջացուցած էր Վարդանի ոտանաւորը, իիչ կը հարցնե՞ս, ոտանաւոր չէ, օղո՞ւլ, պա՛ս պէլասը է, կեանքիս մէջ այսպէս ախմախ բան հի՛չ շարած չէի...

Ու աւագ գրաշարը գնաց իր ընկերոջը օգնելու:

Վարդան ուղեց ճչալ, բողոքել, բացատրել, բայց խելօքութիւն համարեց ինքզինքը զսպելու: Ովքե՛ր էին որ այս տգէտ ու անճաշակ գրաշարները: Ու լուս իր գործին անցաւ:

Հիմա, երբ ուանաւորը արդէն շարուած կապուած էր, Վարդան մէկ մտահոգութիւն միայն ունէր: Զըլլա՞յ թէ խմբագրական սրբագրիչը տպարան գալուն նկատէր ամէն բան, ստուգէր թէ իր ոտանաւորը խմբագրապետէն ուղարկուած չէ և կամ, նոյնիսկ լաւագոյն պարագային, խելքին

փչած պահուն, խելքին փչած եղանակով ջնջէր, ոլր-
բագրէր զայն...

Եւ այդ բոլոր հաւանական ու մահացու վտանգներէն
ապահովուելու համար, Վարդան դիմեց ճարպիկութեան մը,
որուն վրայ մինչև անգամ ինքն ալ զարմացաւ։ Գրաշար-
ներու բացակայութեանը, ծիշտ այն մելանով ու գրչածայ-
րով, որով խմբագրական սրբագրիչը վերջին սրբագրութիւ-
նը կ'ընէր, ան անձամբ սրբագրեց իր ոտանաւորը, աշխա-
տելով որքան հնար է քիչ սիալներ գտնել, Վերջը գրա-
շարները սրբագրիչին հետ միասին պիտի կարծէին թէ ոլր-
բագրուած է, պա՛րդ է, ու առանց այլեւայլի պիտի տը-
պէին թերթին մէջ...

Այդպէս ալ եղաւ։ Սրբագրիչը, Վարդանի ամէնէն շատ
ատած մարդը այս աշխարհի վրայ, այս անգամ տպարան
եկաւ իր նշանածին հետ ու ժամուան մը մէջ արագ ու հապ-
ճեպ սրբագրեց, իրար խառնեց տպագրական բոլոր փորձերը
և աւագ գրաշարին յանձնելով զանոնք, ծանր ու տաղակա-
լի աշխատանք մը հազիւ վերջացնող մարդու մը պէս, նը-
շանածին թեւը անցաւ և տպարանէն դուրս ելաւ զուարթ
ու անհոգ։

Հիմա Վարդանի համար երկու անգամ երկուսը հաս-
տատօրէն, վաւերականօրէն չորս էր, Ոտանաւորը պիտի
տպուէ՛ր, պիտի տպուէ՛ր... Ու տպուելու համար կը մնար
օր մը միայն, միայն քսանըչորս ժամ։ Վարդան նոյնիսկ
թուղթի կտորի մը վրայ, մեծ ճիգերով, հաշուեց թէ քսա-
նըչորս ժամը քանի՞ վայրկեան կ'ընէ։

Յաջորդ օրը, երբ մեքենան աւագ գրաշարի ձեռքի
մէկ ուժգին թափով խելագարի պէս դարձաւ ու Տառապան-
ի մէկ էջին վրայ փողփողաց մարդանի ոտանաւորը,
Վարդան այլեւս համսպուեցաւ, որ եթէ մինչև
անգամ ինքը, ամենազօր խմբագրապետը խանգարե-
լու գար իր ոտանաւորի տպագրութիւնը, երբե՛ք, եր-
բեք պիտի չյաջողէր... Օ՛, հիմա, կամ ժամ մը, երկու
ժամ, օր մը ետք, Տառապանի բոլոր բաժանմունքները և ա-

նոնց բոլոր հեռաւոր ու մերձաւոր ծանօթները, պիտի կար-
գայի՛ն Վարդանի բանաստեղծութիւնը...

— Աս ինչ սիրուն ոտանաւոր է, պիտի մտմտար ինք-
նիրեն քաղաքի ամէնէն մեծ բանաստեղծը, Տիգրան վար-
ժապետը։

— Ա՛խ, եթէ մենք ալ կրնայինք այսպէս գրե՛ւ,
պիտի հառաջէին ոտանաւոր գրել չիմացողները։

— Աղջի՛, Սիրա՛ն, թանաք գրիչ բեր այս ոտանա-
ւորը ընդօրինակենք, պիտի ըսէր Վարդուհին իր ընկե-
րուհին։

— Ինչ եմ ըսեր... եթէ ոտանաւոր պիտի գրուի,
թո՛ղ ասանկ գրուի, ակնոցին տակէն կարդալով պիտի
մտմտար Մեծ Աղան, աւա՛զ, առանց զիտնալու, սակայն,
թէ ո՞վ է անոր հեղինակը։

— Կը կարդամ, կը կարդամ՝ աչքերուս չեմ հաւատար,
ա՛յ, զանը՛մ, էս մեր Վարդանն է գրած, պիտի զիջանէր ու
համաձայնէր Քեռի Սիմոն։

— Ոսկի գրչի՛դ մեռնիմ, մատաղ ըլլամ Փիլիխոփայ
խելքիդ, պիտի հեկեկար հարազատ մայրը, թեւերը բացած
կուրծքին սեղմելով տղան։

Ու պիտի լար՝

— Ա՛խ, ողարմածիկ հայրդ գերեզմանէն գլուխը բար-
ձրացնէր տեսնէ՛ր...

Պիտի հիանային բոլորը, բոլորը, բացի մանր մունր,
լակոտ լուկոտ բանաստեղծներէն, որոնց սրախն մէջ նա-
խանձը ժանդ է կապեր... Պիտի հիանար նոյնիսկ ինքը,
պարոն խմբագրապետը։ Պիտի զարմանար թէ ի՞նչպէս է
որ ինք ճանչցած ու ըստ արժանաւոյն գնահատած չէ այսքան
խոստնալից, ուղղակի տաղանդաւոր բանաստեղծ մը... Ու
խմբագրապետը պիտի գար, անձամբ պիտի սեղմէր Վարդանի
ձեռքը, խրախուսէր, թերթը տրամադրէր անոր։

— Խնդրեմ, խնդրեմ, թերթը ձեր տրամադրութեան
տակն է, թերթը ձերն է, պիտի ըսէր...

Ու Վարդան սրտի խորերէն իր ողջոյններն ու չնոր-
հակալութիւնները կ'ուղղէր այդ բոլոր ընթերցողներուն։

Հիմա ան շնորհակալ էր ամէն, ամէն բանի համար. այս աղքիւրին համար, որ փողոցին մէջէն կը վազէր աղմուկով, այն ծառին համար, որ ստուեր կը ձգէր ճամբուն վլրայ, երկնքի կապոյտին, ամպերուն, թոշուններուն, ուսքի տակի հողին ու մրջիւնին, փոշի հանող այս քամիին համար: Շնորհակալ էր որ ինք կար. կ'ապրէր, որ բանաստեղծ էր ինք...

Թերթը տակաւին կէս մը մամուլին տակ և կէս մը դարսուած տպարանին մէկ անկիւնը, Վարդանի բոլոր ընկերները, դրացիները, մայրը, Քեռի Սիմոն, բոլորը, բոլորը, թէև գեռ չկարդացած, բայց արդէն գիտէին թէ Վարդանի ստանաւորը տպուած է: Լրատուն ինքն էր: Ամէն տեղ կը վազէր, ամէնուն կը հասնէր, կը գտնէր ու համեստօրէն կ'աւետէր.

— Տըպուած է...

Տպարանէն, գրաշարներու բացակայութեանը, թըոցած էր տասը օրինակ Տառապանց և բոլորն ալ ծոցի գրպանը դիզած էր:

Կիրակի առաւօտ Վարդան հագած էր իր լաւագոյն լաթերը և ֆենը ծուռ դրած, կանգնած էր եկեղեցիին բակը: Տպարանէն թոցուցած թերթին օրինակները քովն էին կըրկին. ծոցի գրպանէն կախուած, աջ ու ձախ գրպաններէն դուրս նետուած, այնպէս որ իր ստանաւորի կենդանի ցուցանանդէսին նոյնքան կենդանի տպաւորութիւնը կը ձգէր Վարդան:

Եկեղեցիի դուռը սեփականացնող մուրացկաններէն մէկուն — ան, որ հիանալի ջութակ կը նուագէր և Վարդանի փիրուն սիրտը յուղած էր յաճախ — ուղեց օրինակ մը Տառապանց տալ և խոստանալ ամէն կիրակի տասը փարանուիրել, եթէ ան իր տպագրուած ստանաւորին յարմար եղանակ մը յօրինէր և ատեն ատեն երգէր, բայց առ այժմ միտքը փոխեց: Այսօր տասը փարա չունէր հետք: Մտածեց ու հաշուեց, սակայն, թէ ո՞րու պէտք էր տար իր ունեցած թերթերէն:

Արագ հաշիւ մը բաւական եղաւ, որպէսզի Վարդան

զղջար միայն տասը օրինակ թոցուցած ըլլալուն համար: Որովհետեւ՝ պէտք էր Քեռի Սիմոնին թերթ մը յանձնէր անպատճառ: օրինակ մը զրկէր Ամերիկա, փեսայ Սարգիսին, օրինակ մը պիտի ձգէր Մեծ Աղայի վաճառատունը, յարակից ծանօթութեամբ մը, որպէսզի ան կարդար, զղջար և աչքը դուրս գար: օրինակ մը պիտի զրկէր իր նախկին տեսուչին: Օրինակ մըն ալ պիտի նուիրէր Վարդուհիին, որ, ո'վ զիտէ, իր կեանքի ապագայ ուղեկցուհին կրնար ըլլալ... Օրինակ մը սեղանին վրայ պիտի մնար՝ միշտ կարդալու համար: օրինակ մը պիտի պահէր ձեռագիր ստանաւորներուն մէջ: օրինակ մը պիտի փակցնէր սեղանին զիմացը, պատին: Եւ անա հազիւ երկու օրինակ կը մնար պահելու իրու յիշատակ: Քիչ էր, քիչ էր: Տարիները պիտի գային անցնէին ամէն տեսակ անակնկալներով: հրդեհ կրնար ծագիւ, տունը գողե՛ր կրնային մտնել, մուկերը կըրնային կրծել փնացնել... Բայց շատ չտիրեցաւ: Յոյս ունէր որ երկուշաբթի տպարանէն քանի մը օրինակներ ալ պիտի կրնար թոցնել...

12.

Յաջորդ առաւօտ Վարդանի ցնծուն հոգին կրկին կ'արհամարնէր ստամոքսային բոլոր պահանջները և կը մըզէր զայն դէպի տպարանը, որ հիմա ի'րը կը թուէր, ճշշմարտապէս և ոչ կարծեօք:

Տպարանի դրան հասած չհասած՝ տեսաւ աւատ գրաշարը: որ տակաւին հեռուէն գլուխը կ'օրօրէր, կարծես բարկացած էր, բայց, Վարդանի գետնախառն բարեւին ի պատասխան, քանի մը քայլ անզիէն ձայնեց:

— Ծօ՛, օղո՛ւլ, Վարդան, դուն Շուրաշենց Մնօի տըղան չե՞ս եղեր, այլ Վարդան Մամիկոնեա՞ն: Հըմ. օղո՛ւլ, մինչև հիմա մենք մէկ հաս Վարդան Մամիկոնեան գիտէինք, ա՞ն ալ քաջ էր ու զօրավար: Բանաստեղծ Վարդան Մամիկոնեա՞ն ալ կայ եղեր: Խա՛չ որ չէի գիտեր: սա-

կայն դուն ա'ն ըսէ, օղո'ւլ, այդ աղուոր ոտանաւորը դո'ւն էիր գրած...

Վարդանի սիրաց ուռեցաւ այս մտերմիկ ու կարծւաքչ մը հիացիկ հարցումին ի լուր և ան մրմնջեց իր սովորական անհուն ժպիտով.

— Այո'...

— Աֆֆիեր'մ, օղո'ւլ, ա-ֆֆե'-րի'մ, տեսա՞ր հապա... է', դուն ան ըսէ', ամբողջ քաղաքը գիտնայ որ դուն ես գրած, մեզի ինչո՞ւ չէիր ըսեր հապա, մենք աշխարհի խորթ տղե՞րքն ենք, ի՞նչ է...

Վարդան արդէն հիմա կ'ամչնար իր գործի ընկերներէն, մանաւանդ այս մաերիմ, աւագ գրաշարէն գաղտնիքներ պահած ըլլալուն համար:

— Դէ՛ վազէ՛, օղո'ւլ, վազէ՛ պարոն խմբագրին մօտ, ան հիմա նստեր քեզի կը սպասէ՛: Քիչ առաջ հոն էի, ո՞ւր է ատ Վարդանը, ըսաւ, թող անգամ մը զայ խօսինք, ըսաւ, ուրիշ ոտանաւորներ ալ ունի, թող գայ, թող բերէ տպինք, ըսաւ: Դէ՛, թոփ'ր, օղո'ւլ, թոփ'ր, ով գիտէ, դուցէ ամսական կապեն քեզի, թոփ'ր, օղո'ւլ, թոփ'ր...

Թոչելու տեղ չէր մնացեր այլեւս: Վարդան արդէն բարձրացեր էր եօթներորդ երկինքը և, յուզումէն, բաճկոնակին կոճակները կը քանդէր ու կը կոճէր շարունակ: Վաղուց կը փորձէր, բայց չէր կրնար խօսիլ: Սակայն, վերջապէս, ներքին հզօր ձիգով մը քանդեց ու շարժման մէջ դրաւ երանութեան ցանցերով կապկառած լեզուն ու կազեց.

— Պա՛, պա՛, բոն, խը՛մ, խը՛մ, բագիր ո՛ւսուսո՞ւր է...

— Բոփ' եա՛, օղո'ւլ, խմբագրատունն է, գրպանս հօչէ՞... թոփ'ր, օղո'ւլ, թոփ'ր...

Բառորդ ժամէն Վարդան հասաւ խմբագրական սենեակին դրան առջև, ուր զինքը առաջին անգամ դիմաւորեց սրբագրիչը՝ չար ձիծալով մը:

— Հա՛ա, բարո՛ով եկար, պարոն բանաստե՛ղծ...

Ու սրբագրիչը գրեթէ ուժով ներս հրեց Վարդանը

և դառնալով բագկաթոռին մէջ ընկղմած ակնոցաւոր, քիչ մը ծաղկատար, թուխ ու խիստ արտայայտութեամբ խըմբ բագրապետին, ըսաւ.

— Ահա ձեր նոր ինքնաբոյս բանաստեղծ-աշխատակիցը, նոյն ինքն Վարդան Մամիկոնեան...

Խմբագիրը, ըստ երեւոյթին յանկարծակիի եկած, գըրահաշուի առեղծուած մը լուծողի մը արտայայտութիւնն ունէր հիմա, ու կը թուէր թէ ան մզուած է ակամայ համեմատելու Վարդանի զլուխը՝ ոտքերուն, փորը՝ հակափորին, հասակը՝ անունին, ազգանունը՝ տպուած ոտանաւորին և այս բոլորը՝ Տառապանք թերթին ու ի'ր հետ...

— Անունդ ի՞նչ է, հարցուց խմբագիրը զապուած զայրոյթով:

— Վարդան:

— Ազգանո՞ւնդ:

— Մամիկոնեան:

— Շուբաշեա՞ն թէ Մամիկոնեան:

— Ուրիշները թէւ Շուբաշեան կը կանչեն, բայց մենք Մամիկոնեան ենք:

Խմբագիրը զլուխը օրորեց, սեղանին վրայ դրուած Տառապանքի վերջին համարը վերցուց և թերթը բանալով ու Վարդանի ոտանաւորը մատնանշելով, հարցուց.

— Այս ոտա... ասիկա դո'ւն գրած ես:

— Այո' :

Եւ Վարդանի ձայնը կարծես յաղթական էր նորէն:

— Եւ դո'ւն տպած ես:

— Այո'...

— Իսկ ո՞վ ըսաւ քեզի որ տպես...

Այս մէկ հարցումը արդէն անտեղի էր, և Վարդան չէր կրնար արագ ու լաւագոյն պատասխան մը տալ: Որովհետեւ հարկ էր որ Վարդան՝ Մամիկոնեան տոհմի ամբողջ պատկառելի անցեալը իր բոլոր ծալքերովը բանար ու փոէր խմբագիրին առջև, յիշատակէր պապհայր անուս փիւսոփայի և լուսահոգի պապ Մամիկոնի կեանքն ու գործը փառաւոր, պատմէր հօրը, Մնացական աղայի ուխ-

աը Խրիմեան Հայրիկի ներկայութեան և ամէնօրեայ կտակը իրեն՝ Վարդանին, և վերջապէս զարդագէր տարիներու խոռոշը սեփական հագիին ու քնարական զեղումները իր գրիչին, որոնք բոլորը միասին՝ Հազարաւոր չափածոյ և կշռաւոր տողերու վերածուած՝ տպուե՛լ, տպուե՛լ կը բաղձային, հարթելով ու արհամարհելով ամէն խոչ ու խոչընդոտ...

Սակայն, այդ բոլորը ըսելու համար, պէտք չէր որ Վարդանի լեզուի կապերը չարագէպօրէն հանգուցուած ըլլային, իսկ խմբագիրը համբերելու պատիկ առաքինութիւն մը պէտք էր ունենար: Մինչդեռ, աւա՛զ խմբագիրը, իր զայրոյթը այլեւս զապելու անզօր, ուժի ելած և ատամերը կրծելով Վարդանին մօտեցած վանկ վանկ կը հեգէր իր վերջին հարցումը.

— Իսկ ո՞վ ըսաւ քե՛զի, որ աը-պես-ս'ս:

Ակնթարթի մը մէջ Վարդանի այտերուն կարծես իրարու յաջորդող զոյդ կայծակներ կ'իջնէին՝ զոյդ մը զօրաւոր ապատակներու շառաչով, մինչ Վարդան կը լսէր իր երբեմնի մեծարած քաջանմուտն ու քաջատումիկ խմբագիրի գորգոսոցը.

— Եթէ անգամ մըն ալ համարձակիս ոտքդ տպարանէն ներս դնել և ոտանաւոր մրոտել, ոտքդ ալ լեզուդ ալ կտրել կու տամ, թշուառակա՞ն...

Ու խմբագրատան սանդուխներէն, դատարկ, կիսաշարդ ու մեծադղորդ տակառի մը պէս գլորուելով՝ Վարդան երկար ատեն չէր կրնար հաշիւ տալ — դէպի լոյս աշխարհը կը փախչէր ինք, թէ դէպի դժոխքը...

* *

Այս եղերական վախճանին զուգադիպեցան զօրակոչը և մեծ պատերազմը իրենց բոլոր արհաւիրքներով — կորուրածներով և գաղթ-տարագրութեամբ:

Հիմա շատ տարիներ են անցեր ու Վարդանի մասին վաւերական աեղեկութիւններ կը պակախ ինձի:

Սակայն պնդողներ կան, թէ Վարդան, թէ տարագիր,

բայց ողջ առողջ կ'ապրի հեռաւոր գաղօւթի մը մէջ և. կեանքի անողոք հարկադրանքին տակ, կը շարունակէ իր հանգուցեալ հօր, Մնացական աղայի արհեստը: Բայց, մեծ ու պզտիկ դլուխներ խուզելով և ամէն տեսակ երեսներ սափրելով, Վարդան բնաւ և երբեք լքած չէ ո՛չ իր քնարը, ոչ իր տոհմիկ սրբազն աւանդութիւնները, ոչ ալ մանաւանդ իր ժառանգական աստուածային կոչումը՝ գրիչն ու բանասեեղծութիւնը:

Նոյնիսկ վերջերս պնդողներ եղան թէ կան թերթեր, որոնք պատրաստ են սիրով հիւրընկալելու անոր ոտանաւորները, բայց ինքը, Վարդան, պարզապէս սկզբունքով դէմ է թերթերու մէջ հանդէս գալուն և կը պատրաստուի, տարիներու ընթացքին ածելիի ծայրով կաթիլ կաթիլ հաւաքած և ետ դրած յատուկ հիմնադրամով մը հրատարակելու զուտ գրական-գեղարուետական ամսագիր մը, որուն անուան յարմարագոյն ընտրութեամբ զբաղած է առայժմ Վարդանի գործող սւղեղը:

(Վերջ)

ՀԱՅԱՍՏԱՆԻ ԳՐԱԴԱՐԱՆ



NL0127184

44385

„ՄԱՍԻՄ“ ԳՐԱՏԱՆ ՀՐԱՏԱՐԱԿՈՒԹԻՒՆՆԵՐԸ

	Լեզ
1. Ասուր-Նազիր-Աբալ	Կ. ՄԵՃԵԱՆ 10
2. Մեծապատիւ Մուրացկանները	Զ. ՊԱՐՈՆԵԱՆ 30
3. «Մասիս» Տարեգիրք Ա. Տարի	Ա. ՍԵՒԱՆ 100
4. Թանկազին Համբոյր (Կակերպ. 1 առար)	10
5. Գիրուկ Մարդուն Հանոյցները	ՈՒ. ՃՈՆՍԸՆ 15
6. Հռոմի Պապին Զաւակները,	Մ. ԶՃԵՎԱ.Ք0 150
7. Գուշակը (Երգիծավեպ)	ՄԹ. ՔՈՍԹՈՎ. 20
8. «Մասիս» Տարեգիրք Բ. Տարի	Ա. ՍԵՒԱՆ 100
9. Հրաժեներու Պալատը	Մ. ԶՃԵՎԱ.Ք0 150
10. Խելազար Հայունին	ՏՈՒԹ. ՃԵԼԱԼԵԱՆ 65
11. Մուսա Լերան 40 Օրերը Ա. Բ. Հատու ՖԲ. ՎԵՐՖԵԼ.	400
12. Ռակարաքինի Ասպէտը	Մ. ԶՃԵՎԱ.Ք0 150
13. Հին Հայ Բանասեղ ծուրիւնը	Գ. ԳԵՂԱՐՔՈՒՆԻ 30
14. Հայ Եղեռնը	Մ. ՆԵՑԻՄ 20
15. Թարզան	ԷՏԿԱՐ ՌԱՅՍ ՊՈՐՈՒ 50
16. Յոյն Լրտես. Գործունեուքիւնը Պոլսոյ մեջ	20
17. Վիթօֆ	ԱՐԹԻՒՐ ՊԵՐՆԵՏ 100
18. Վարդան Մամիկոնեան	ՕՆ. ՄԽԵԹԱՐԵԱՆ 20

ԱՐՏԱՍԱՀՄԱՆ 4 ՖԲ. ՖԲ.